

ልእክት ርኢስ ኢሰያስ እብ መናሰበት ሰነት ሐዳስ

ሓይሰ ርኢስ ኢሰያስ አፍወርቂ፡ እብ መናሰበት ሰነት ሐዳስ 2018፡ እግል ክሉ ሸዕብ ኤራትሮፕ እት ቀበት ዐድ ወክሮ፡ እት አድመኖት ሰያይት ወጠን ወበራምጅ ዐማር ፍሩራም እግለ ህለው ቅዋት ድፈሪ፡ ክምሰልሁመ ፈተኛ ወመሳኒት ኤራትሮፕ ንየቱ ሰኔት ሸርሐ።

ርኢስ ኢሰያስ እት ልእክቱ፡ ሸዕብ ኤራትሮፕ እግል ክሉ ዋይዲባት እብ ሰባተቱ ወመዳፈዐቱ እንዴ ተዐደዩ፡ እት አፊት መስተቀበል ባርህ ምን በጽሐ አሰናዩ እት ልብል፡ ሰነት



ሐዳስ ሰነት ኼር እግል ትግበእ ትመነ።

ዝያረት አንፋር ውዛረት ካርጅየት እት አካናት

ዐማር

ሐድ 200 ለገበኣ አንፋር ውዛረት ካርጅየት፡ እብ መናሰበት ሰነት ሐዳሱ፡ ምን ዮም 21-29 ዲሰምበር፡ እት አቃሊም ግብለት ወቅብለት በሐር ቀየሕ ወጋሽ-በርከ ለልትረከብ አካናት ዐማር ወታሪክ እግል ልርአው ዝያረት ሰጅለው።

ለዝያረት፡ ጋሕቱላይ፡ ባጽዕ፡ ገልዓሉ፡ ዕዲ፡ ዐሰብ፡ ረሐይተ፡ አፍዐበት፡ ነቅፋ፡ ሳዋ፡ ከርከበት፡ ሃይተት፡ እምሐጀር፡ ሰነይ ወእተ ከዋ ለልትረከብ በራምጅ ዐማር ለትሸምል ለዐለት።

ለሱፈረኢ ለልትረከቦ እቶም 95% ምኖም ሸባባት ለዐለው አንፋር ረሐይተ እት በጽሐው እቱ ወክድ፡ እብ ሱልጣን ዐብደልቃድር ዳውድ እንዴ ትተለው፡ እቱ ለልትረከብ ታሪካይ ምድር ወአካናት አሳር ረአው።

እተ መናሰበት፡ ሱልጣን ዐብደልቃድር፡ ለድዋራት እምበለ ካዝኑ ለህለ ርዝቅ አሳር ወዓዳት፡ ዛይደት አህምየት እስትራተጅየት ክምቡ እት ሸሬሕ፡ ሸባባት ዓዳቶም ወሰዋልፎም እቱ እግል ልተረዶ

ለገበኣ መትነዛም ዓዳት ሸባባት ዝያድ መትሐሳር ክም ልትህየቡ አፍሀመ።

እት ውዛረት ካርጅየት ሙዲር ዓም ቅስም ብሐሰ ወሕፍዝ ሰፊር ዒሳ አሕመድ እተ አስመዐየ ከሊመት፡ ሀደፍ ናይለ ዛያረት፡ ደማነት ነብረ እግል አክዶት ወመናበረት መዋዕኒን እግል ትስኔ ልትሰርገል ለህለ እግል ድዋራት ረዩም አውለውየት ለለህይብ በራምጅ ዐማር ኖሶም እንዴ ሐድረው፡ እተ መጃል ፈህምም እግል ወቀሎት ክምቱ ሐበረ።

መሸተርከት ናይለ ዝያረት እግል ኤሪን እተ ሀበወ ሐብሬ፡ ቀደም እለ እብ ድግም ለአሙሩ ለዐለው ታሪካይ አካናት ወመሻሬዕ ዐማር እብ ፍዕል እግል ልርአው ክም ቀድረው እት ለሐብር፡ እብ መቅደረት ኖሰ እብ ዓመት፡ ሸባባት ህይ እብ ፍንቱይ ለልትሰርገል በራምጅ ዐማር፡ ክምሰልሁመ እብ ዐውለመት ተእሲር እንዴ ኢገብእ እቱ፡ ዲብለ እት ረሐይተ ልተላሌ ለህለ ሐዳራት ዓዳት ለሰምቱ መትዐጃብ ሸርሐው።

ባርንቶ፡ ጌማም ወራታት ሐርስ ገብእ

እተይ ሐርስ እግል ረሸዶት፡ ሕፍዘት ማይ ወትርበት አሳሲ ሰበት ቱ፡ እዳራት ወስነን እብ ዋጅብ እንዴ ትነዘመው ዝያድ መትሐሳር እግል ለሆቡ ክምሰል ወጅብ፡ ወዚር ሐርስ አሰይድ አረፋይኔ በርሄ ትፋነ።

እት ዮም 29 ዲሰምበር እት ባርንቶ እተ ገአ ጌማም ፈርዕ ውዛረት ሐርስ እተ ሀበዩ ሸርሕ ወዚር አረፋይኔ፡ እት ክል ድዋር እብ ሸክል ከረም ሐርስ ልግበእ ወመሰኖ ዐማር ልትዐመር ለህለ ሐርስ ለትትሐዜ ፍገራት እግል ትትረከብ ምኑ፡ እት ሕፍዘት ማይ

ወትርበት ለረከዘ ወራታት እግል ልደቀብ፡ ርቱብ በደሎት ዘርእ እግል ልትከደም እሉ፡ መትነፈዶት ሸፍር ጠቢዐት ወዳፈዶት ባልዒን ህይ እብ ዋስዕ እግል ልትከደም እብ አትፋቀደ።

እት አቅሊም ጋሽ-በርከ ደዓም፡ እት ዐማር ዘርእ፡ ሐምሌ ወፈዋክህ፡ ዐማር ሐሊብ ወሰነ፡ አንሰሶት ንህብ ወደወርህ፡ ሕፍዘት ማይ ወትርበት፡ ዓቅቢት ዓፍየት ንዋይ ውብዕድ ሄራርም እት መንበር ሸዕብ ወለ አግደው ዶር እብ ከሰሰ ተቅረር ትቀደመ ወህድግ ገአ እቱ።

መሸተርከት ህይ፡ ንዋይ ወፍገራቱ እግል ሐረሰቶት እብ ተአትናይት ገበይ እግል ልትከደም እሉ፡ ፍገራት ሐምሌ ወፈዋክህ እግል ክሉ እብ ለአከሰብ አርደት ወጢት እግል ትትከለቅ እሉ፡ አትመቃረሐት ትራክተራት ሕክመት እግል ልትሓየሰ ውብዕድ ረራእ ቀደመው።

ሓክም አቅሊም ጋሽ-በርከ አሰይድ ፍሰሃይ ሀይሌ እተ አስመዐየ ከሊመት፡ እተ አቅሊም ለገብእ ወራታት ዐማር ጀራዒን ወዐግምት ወቀዩ ለለእክድ አግቡይ እግል ለሀሌ እሉ ትፋነ።



መርከዝ ፋገዶት 'ኬርተ' ልትደሐር

እት መዲነት አስመራ፡ ድዋራት ዐዳገ ሐሙስ እብ ሐድ 9.5 ሚልዮን ነቅፋ ለትበነ መርከዝ ፋገዶት 'ኬርተ' እት ዮም 30 ዲሰምበር ትደሕረ።

ለእብ ሓክም አቅሊም ምግብ ሚጀር ጀነራል ረመዳን ዑስማን አውልዶይ ለትደሕረ መርከዝ፡ አሳሲያይ ከደማት ፋገዶት ለትወጀደ እሉ፡ ክምሰልሁመ እብ ጣቀት ጸሓይ ለሸቄ አንዋር ወዕንባባታት እብ ልትሰርጋቱ።

እተ መናሰበት፡ ሙዲር ዓም

ቅስም ዐማር ብናእ አቅሊም ምግብ ኢንጂነር ተሰፈአለም ወልዴሚካኤል፡ እሊ እት 7,140 ምትር-መረበዕ ለትበነ መርከዝ ፋገዶት፡ እብ ክሉ አርካኑ እት ረአሰለ እግለ ድዋር ለለህይቡ ጀላል፡ እግል ፋግዶት ዓይላትመ ወጡይ ክምቱ ሐበረ።

ሙዲረት ምዴርየት ዐዳገ ሐሙስ አሰይደ ሳሊሐ መሐመድ-ዐሊ እብ ተረተ፡ እግለ ምን መንፈዐት በረ ጋብአት ለዐለት አካን፡ እት መርከዝ ፋገዶት እግል

በደሎተ ለትነሰአት መባደረት እት ተሐምድ፡ ሰነን ለአርወ መትሰባል ሐመደት።

እት ደንጎቤ እት ሸቅል ዶር ፍንቱይ እግለ አግደው፡ ምን ሚጀር ጀነራል ረመዳን ዑስማን አውልዶይ ሸሃዳት-ሸረፍ ትከበተው።

እግል እሊ መርከዝ ፋገዶት ህይብት ለህሌት ሰሚት 'ኬርተ' እት ገብእ፡ ለአካን እት ድዋራት ሰጋደት ዐሾርም ለትትረከብ እት ንዳልነ ዶረ-ለአውፊት እስትራተጅያይት አካን ተ።



ሰነት በኪተት ወሰዲደት !!

ሓይሳም ቁርኢት ጀ.ኢ.ሐ.፡ ጀሪጀትኩም እካተ 10 ሰነተ ግራህ አዶረተን። ከመዳከየት ወኪትበት አሰናይ ዲብ እክ ለብጸሐኒ ዲብ ክብሎ፡ እትኪ ካክኦ ዕቁድ ናይ ዕምረ ከሐሰት ወኪወጀበት መሻረክትኩም እግሌ ትርኢ ክሰኡ ሀኪው። ትምኔቶም ክም ኢተዓብሮ ህይ ዳምናም ቶም።

ሰነት 2018 ሰነት በኪተት ትግበእ እግክነ !!

መትግዋል ማልያይ

መትግዋል ማልያይ እብ አግቡይ ቃኑን ወገንነት እግል ልግበእ ክምሰል ወጅቡ ጠቢዒ ወምን ቀዳሙ ለእዉጅቱ። ዲብ ዲሰምበር 2015 እት ሸቅል ለዐለት ሰላዲ ነቅፊ እብ ሐዲስ እት ትበደለት ዲቡ ወክድ ሀዩ ቀዩሮት ሰላዲ፡ ለዐለ እቅትሳድያይ ሰላላት እብ ተማሙ እግል አርሀዮት ለአመመ ብዙሕ እትጃሃት ወአሀዳፍ ለከምከመ ስታት ሰበት ገብኦ፡ ምሰሉ እንዴ ትጸበጠ ቃኑናይ አግቡይ ሸቅል ወመምሬሕ ትሩድ እግል ልግበእ እሉ ከመራቀበት እግል ትግበእ እቱ ክምቱ እበ ከሰሶም ጀሃት ሕኩመት ሐብሬ ወተፋሲል ተውዴሕ ክምሰል ተሀዩበ ለልትረሰዕ ኢኮን።

ዎሮ ምን ምሰል ቀዩሮት ሰላዲ እንዴ ትጸበጠ እግል ልትአንበት ለትቀረረ አግቡይ ሸቅል ናይ ተጃረት ወብሕተ መትግዋል ሕክት እብ ሰላዲ ኩብት፡ እብ ብዕድ ሰርጉል ወዘያድ ደማን ለለሀይብ ኣላት በሀለት እብ ቼክ ምን ሕሳብ ዲብ ሕሳብ እብ ዐደዮት ክምሰል ልትበደል ዊደትቱ። እብሊ ሀዩ፡ ባንካት፡ ሽዑብ እሊ አግቡይ ሸቅል እሊ እግል ልልመድ ሌጠ እንዴ ኢገብእ፡ ለወራት ሰርግልት እንዴ ገብኦት እብ ካሽ ሽቅየት እት ትደሀረት ደረጀተ ጀላብ እግል ትትከሬ ጸገም ትሩድ ሰርግል ሀለ። ምናተ አግቡይ ሸቅል ባንካት፡ ዘበናይ ቱክኖሎጂ፡ መቅደረት ወተጃርብ አዳም ለጠልብ ሸቅል ሰበት ቱ፡ ዲብ ትትሐዜ ደረጀት በጽሐ እግል ልትበሀል ኢልትቀደር። ደአም ሀዩ፡ ልትሸቁ እቡ ሀለ።

እብ ሰላዲ ክብት ለገብእ መትግዋል እብ ኩሉሁ ናይ አምን፡ መሕበራይ፡ እቅትሳድያይ ወብዕድ ኢውጡይ ወለለአስፍቱ። እብ ተውሳክ እብ ሰላዲ ክብት ለገብእ መትግዋል ሰነድ ታምም ሰበት አለበ፡ ጥልበት፡ ደሪበት ወብዕድ ዋጅባት ቃኑናይ ዲብ ኪደት፡ ዲብ አትናያት ዐዳገ ጸላም፡ ቅያስ ሰርፍ ሰላዲ ወጠንያይት ዲብ ሐምረጎት፡ እት ረፊዕ ቀለ ዐውል ብዳዐት፡ ሰላዲ ካርጅ እት ዝዚሕ ለሀሌት እሉ ግዴት ወአዘ ክምሰልሁመ መደረቱ ዲብ መናበረት ሽዑብ እብ ቀሎ-ቀሎ ለልትረኡ ኢኮን። ቃኑናይ አግቡይ ሸቅል ክም ዓዳት እግል ልሰበቅ ወልትደቀብ ገብእ ለጸንሐ ጸገም፡ እሊ እግል አውካድ ረዩም ልሙድ ለዐለ ኢቃኑናይ አግቡይ ሸቅል መታክል ጋብእ እቱ ክምሰል ጸንሐ እሙርቱ። አዜመ ምን ሕሳብም ሰላዲ-ክብት እብ ዶልዶሉ ዲብ ለአፈግር፡ ዲብ ባንክት እንዴ አቅበለው ሰላዲ ለኢለኣቱ፡ እብ ገበይ ቃኑን እግል ልሸቀው ልግበእም ዒማት ወቅያስ እተዮም እግል ለትአምሮ ለይለሐዘ፡ ቼክ መትከባት ለለአቡ፡ ደሪበት ለኢደፍዶ፡ እት ወራታት ኢቃኑናይ ክምሰል ከረ ሰርፍ ወአተዮት ግሩሽ ካርጅ ለትፈረረው ኢትሐገለው። እብሊ ሀዩ ሕኩመት ለተአትሐዜ መራቀበት ዲብ ትወዴ ምስዳራት ትንሰእ ሀሌት።

ክም ክፈል እለ መራቀበት እለ፡ ቃኑናይ አግቡይ ሸቅል ለኢተበዐዩ ሐድ 450 መአሰሳት(መብዘሐን መትሐድረት ለገብኦዩ መአሰሳት) ክም አወላይ ተሕዚር ከባደትለ እሉ ወደዩ ከዩድ ቃኑን ዲብ ትትረኡ፡ ምን ዎሮ አሰክ ሰማን ወሬሕ ለልትመደድ ናይ ዶሉ ምስዳር ደብእ መአሰሳት ንሰእት እተን ሀሌት። ብዝሐ እለን ምስዳር ቃኑናይት ንሰእት እተን ለሀሌት መአሰሳት ምሰለ እብ ደረጀት ወጠን ለሀለ ዝያድ 58,000 ብዝሐ ምልክዩት ሩከስ ልትረኡ ዲብ ሀለ ብዙሕ ምንመ ኢኮን፡ ክም ዛህረት ላኪን እግል ተአምሸሽ ምኑ ለኢለስትሀልቱ። እሊ ንዛም ናይ አጽበጦት ተሰዩሕ ሀደፋ፡ ቃኑናይ አግቡይ ሸቅል ክምሰል ዓዳት እግል ልሰበቅ ክምቱ እት ወግም እንዴ አተ በገ፡ መዋጥኒን እብ ዓመት ሰብ መአሰሳት ሀዩ እብ ፍንቱይ መስኡልየት እንዴ ረፍዐው እብ ገበይ ቃኑንየት እግል ልሸቀው ዋጅብ ዋጠንያይ ቦም። እግልሚ፡ ናይ ደንገበ ሀደፋ አደቀቦት እቅትሳድ ወጠን ወአከዶት መስለሐት ወሕቁቅ ገቢል ሰበት ገብኦ።

መጽልስ አቃሊም ምግብ ወግብለት 17^ይ ርቱብ እጅትም ሰርግሎ



መጽልስ አቃሊም ምግብ፡ “ካድም ሕበር እግል መዳፍዐት ወማር ወጠን” እበ ትብል ሰቅራት፡ 29 ዲሰምበር 17ይ ርቱብ እጅትም ሰርግሎ።

ርኢስ መጽልስ አሰይድ አብርሃም ሰመሬ፡ እብ ደረጀት አቅሊም እብ ሰበትለ ትሰርገለ ናይ እጅትማዕየት፡ እቅትሳድ፡ ሰያሰት ወብዕድ ወራታት እት ትቀደመዩ ትቅሪር፡ ደማንነት ነብረ እግል ትትአከድ፡ እብ መሻረከት ሽዑብ ዛይደት ዲብ ሕፍዘት ማይ ወትርበት፡ ሸትል ወሕዛዕ፡ ምሰልሁመ ሸቅየት ከዛናት ወአሽራም በራምጅ ዐባዩ ከም ትሰርገሎ፡ ከደማት እጅትማዕየትመ፡ ዲብ መናበረት ሽዑብ ተቅዩር አሳሲ ለለአመጽእ መሻርዕ ልትሰርገል ከም ሀለ እብ ተፋሲል ቀደመ።

መሐገዝ ማይ ሐል እግል ልርኩብ ለትበገሰ በራምጅ ዐባዩ፡ እት-ክምሰልሁመ ከደማት ከሀረበት እብ ገበይ ንዝምት እት ክሉ እግል ልብጸሕ ለገብኦት ክሰእት ረአሰማል ፍገራት እግል ትትረከብ ምነ ከም አንበተት እንዴ ሐበረ አሰይድ አብርሃም፡ ብዕድመ እብ ደረጃቱ ሐል እግል ልርኩብ፡ መጽልስ እብ ገበይ ልጃኑ ምሰለ ከሰሶም ጅሃት ሕኩመት ዲብ ልትፋሀም ሸቁ ከም ሀለ ሸርሐ።

እምበል እለ፡ እት ሐን መጽልስ ለሸቅየ ልጃን ዐማር እቅትሳድ፡ ከደማት እጅትማዕየት፡ ዓዳት

ወለመድ፡ ቃኑን ወንዛም ተቃሪን እንዴ ቀደመዩ ተሀደገ እቱ።

መጽልስ እት አፍገረዩ ሸርሕ ክታሚ፡ መሻረከት ሽዑብ እት ልሰርገል ለሀለ በርናምጅ ዐማር እግል ትዕቢ፡ ለትዳለ ሀዩ እብ ዋጅብ እግል ልትነፋዕ እቡ እት ዘርእ ወንዋይ ለልትርኤ ሕማማት ወባልዒን እግል ልትሀወን ምን ቀዳሙ መዳሊት እግል ልግባእ፡ ለፈግር መምርሕ ወአዋጃት ሽዑብ እብ ፈዛዐት እት ፍዓልየቱ እግል ልክደም ለልብል ወብዕድ ንቃዋ ብእቱ።

ሓክም አቅሊም ምግብ ሜጀር ጀነራል ረመዳን ዑስማን አውልያይ እት አስምዐዩ ከሊመት ካቲመ፡ እት ሰነት 2018 አሳሲ ጠለባት እጅትማዒ እግል ለአትምም ብገሰ ለሀለ በራምጅ ዐማር ዐባዩ እበ ተአደምዕ ገበይ እግል ልሰርገል ጅሀድ ወመሻረከት ሰካን እግል ልዕቢ ትፋኑ።

እሊ ክእነ እት እንቱ፡ መጽልስ አቅሊም ግብለት፡ “ውሕደትነ በዲል ለአለበ ሐለትነ” እበ ትብል ሰቅራት፡17ይ ርቱብ እጅትም ሰርግሎ፡ ዮም 26 ዲሰምበር እት መዲነት መንደፈረ ሰርግሎ።

ርኢስ ማሕበር መምህር ወልዳይ ገብሬ እት አስምዐዩ ከሊመት፡ እትለ ትፈናተ ደዋራት ናይለ አቅሊም ልሰርገል ለሀለ በራምጅ ዐማር እብ ዓመት፡ ብንዩት ትሕትየት አግቡይ፡ ጣቀት፡ ማይ ሀዩ እብ

ፍንቱት እት መናበረት ሽዑብ መረሀዮ ከልቅ ክም ሀለ እንዴ ሐበረ፡ ለመሻርዕ እግል ልትሰርገል መሻረከት ወፈዛዐት ሽዑብ እግል ቲዚድ አትፋቀደ።

አንፋር መጽልስ፡ እት ሰነት 2017 ኣብ ደረጀት አቅሊም እዳረት አቅሊም ወአፍረዐት ውዛራት ለትሰርገለ ወራታት አሮት ከእብ መጃሉ እት ትቀደመ ተቅሪር ሐቀለ ወደው ህደግ፡ ትሩድ ወሐዋን ጅዋንዐም እንዴ ቀዩመው፡ ሰዴ ለቤለው አራእ ቀደመው።

እትለ ሰነት እለ ምነ ትሰርገለ በራምጅ ዐባዩ፡ አትመቃርሐት አርድ ሐርስ ወመምርሕ ክራይ አብያት ናይ ብሕተ ለከሰስ ክም ቱ ልትሐበር እት ሀለ፡ ዐመልየት ተዐዲል አራዲ ጋብኦት ክም ዐለት፡ ሐዲስ ምምርሕ ክራይ አብያት ሀዩ እት መዳይን ወሸብህ መዳይን እብ ደረጃቱ ሸሩጣት ተምም ክም ሀለ ትሸርሐ።

እት ደንገብ፡ መጋድዕት ወተሐዲይት ተግውን መፍርየት ሐምሌ ወፈዋክህ፡ እትክምሰልሁመ ሐ ሐሊብ መትሐሳር እግል ልትሀዩቡ፡ ሕዳን ጠወርት እተይ ሐርሱ፡ ደወ ወፍድኢት ንዋይ ሐል እግል ልግባእ እግሉ፡ አካናት ታሪክ ወስያሐት እግል ልትሐፈዝ ድራሰት ሐዳስ እግል ትግባእ መባደራት እግል ልትነሳእ ለልብል ቀራራት ወፊናታት ትቀደመ።

ድጌ መትከምካም ደገጊት

እት ምዴርየት ድጌ፡ እት ሰነት 2017 ለትሰርገለ ወራታት መትከምካም ደገጊት ወኬወ ለለአደምዕ ከም ዐለ ትሸርሐ።

መመቅረሓይ ሸቅል ምዴርየት አሰይድ ህንጻኣብ ወልዱ፡ መስኡል እዳረት ወማልየት አሰይድ ስምኦን የማኔ እት ቀደመዉ ተቃሪር፡ መትከምካም ደገጊት፡ አትፋዝያት ተዐዲል አራዲ ሐርሱ፡ ሰዳይት ዓይላት ሹሀደ፡ ጀምዕ ደራይብ ንዋይ ወኬወ ለከምክም በርናምጃት ከም ትሰርገለ እንዴ ሐበረረው፡

ዶር ወመሻረከት ሰካን ሐመደው።

እምበል እሊ ሕርያን መስኡሊን እዳረት ደዋይሕ ወመመቅረሐት ሸቅል ከም ገብኦ፡ ፍድኢት አጀኒት ዐቦት ከም ሰጀሉ፡ ዝያድ 34 አልፍ ናሙዝያት ከም ትወዝዐ፡ ብዝሐ እት መአሰሳት ዓፍየት ለልትፈረጀ እማት ከም ወሰከ ዲብ ልትሸራሕ፡ እት መጃል ተዐለም እበ ገብኦ ጅሀድ፡ መሻረከት አንሳት እት አወላይት ወምግባይት ደረጀት ዐቦት

ምንመ አርኤት፡ ክመ ልትሐዜ ክም ኢኮን ትሸርሐ።

እት ደንገብ፡ እት እዳራት ደዋይሕ ዐድሼክ አልአሚን፡ ዐድ አብርሂም ግርጅናይ፡ ሃዋሻይት ውሓሻኪቶን ለሀለ መሐገዝ ማይ ሲቶ ሐል እግል ልርኩብ እምቡት ለሀለ መባደራት አተላላይ፡ እት እዳረት ደዋይሕ ለሀለ ኬሩ ከዛን ማይ እግል ልትሸቁ፡ እት እዳራት ደዋይሕ ሐሻኪቶ ወዐድ አብርሂም በርናምጃት አሰነዮት ጀሪፍ ከም ሀለ ተአመረ።

5ይ ክፈል

አምዕል ዕድሞም ዲብ ትጤጤ ክምሰል መጽእት፡ አርበድ ምን ጽባብሐ ንዋዩ እንዴ ሐልበ እግል ሊጊስ ትዳለ። ምናተ፡ ለዐድ ገሌ እግል ኢልሕዜ ምኑ ሰበት ፈርህ እግል ለኣትማሴ ሐረ። ስተል እብ እንክረ እግል እመ ትሰዴ እንዴ አምሴት፡ አሰክ ዐድ ሰክብ ትጸበረት። ሐወ ወአቡሀ አጊድ ምንመ ሰክቦ እ’መ ክልዶል እንዴ አምሴት ሰበት ትሰክብ “ያረቢ አጊድ አሰክቦ እት ትብል ድዴት። አው ከደን ትቃበለዩ ምን ገብእ፡ እያድ እግል ትቅረሕ እንዴ ትቤ ክርቢተ አዳሌት። እ’መ ላተ እት ተዐማትት ወትከማትት አጊድ ኢሰክበት። ስተል እግል ትጸበረ ለዐለት ገበይ እንዴ ጣዩመት ዲብ ሕቅፍ አርበድ እግል ተአምሴ ሰኒ ሻፍገት ምንመ ዐለት፡ እት ግራህ እ’መ እንዴ ሐሶሴት እግል ኢትትህ’ለግ ከብደ ትትተት ዐለት።

አርሄት አግርበት ቤተ ክምሰል አካክበት ከነው እብ ስካብ ትቤ። ስተል እንዴ ትጸበር ዐለት እ’መ እግል ተሐንርር ክምሰል አንበተት እብ ቅሩተ ምነ ቤት ፈግረት፡ ዲበ አፍለ ቤት ለዐለ ብልብል እንዴ ነስኣት ዲብ ቀበትለ ጽልመት ሐራሳ ክባባይ ገብኣት። አክራናት በይሑት ወሐሻይል እንዴ ልትሰመዕ፡ ሸማል በሩድ ምን እንክር ቅብለት እንዴ ወልውል፡ ቀወሬዕ ናይለ አወድግ “ቃቅ- ቃቅ” እት ልብል እብ ቀበትለ ድበዕ ትጠለቀት።

ሐቐ ናይ ሳዐት ሄራር፡ ስተል ዲበ እበነተ ዕድም ክምሰል በጽሐት፡ አርበድ ግሱይ ዲብ እንቲ ጸንሐዩ። “አርበድ ሐቶ፡ በደርከኒ፡” እንዴ ትቤ እት ገርቡ ትለውሉት።

“ገበዩ ምን ገበይኪ ሰበት ትቀርብ እግል እብደረኪ ላዝም ቲ፡ አሰናይ እብ ሰላመትኪ መጽእኪ፡” ቤለዩ እበ ቀልዓት እደዩ እንዴ ጣሰሰ። ህታመ እበ አጩብዓተ ለማይማዮ እንዴ ትጣሰሱ ዲብ ገርቡ ነሸበት። አቅርን ለገ ለመሰለ አክቡባተ ዲብ ነሐሩ እንዴ ራግዛሁ፡ ሰንደል ለትጽኔ መሃይቲበለ ገርቡ እንዴ ትገልበበት ብርድ እት ትከፊዕ ምኑ፡ ህጅትም አንበተው። አርበድ ምነ እምጽኦ ለዐለ ዐጅወት እግል ልላውሽ እግለ ክምሰል ቤለ፡ “እሰልፍ እንተ ብለዕ” ቲለቲ፡ ስሕቅ እት ትብል። ለሐሊብ መጠቅ መሰል ስሑቃዩ እግለ እት ፍንጌ አፋሁ ወአፋህ ለዐለት መሳፈት አብርሀተ።

“አበደን!” ቤለ አብረደ እግለ ተመር ዲብ አፋህ እንዴ ለውሽ። ትንፌሳዩ ስሕብ እንዴ አበለት ስሕቅ ሐቆለ ወዴት እግለ ተመር መጭረተ። ለተመር ምሰል ጠዐም ኖሰ ለዘት ሻም አርበድ ሰበት ተሓበረት ዲበ ቀደም እለ ለኢጠዐመተ ነብረ እንዴ ገብኣት ትሰምዐተ። አርበድ እብለ እንዴ ኢልትገሴ ዲብ ህወት ሐሊብ እንዴ ሐልበ ማጽእ ሰበት ዐለ፡ እንዴ ፈትሐዩ፡ “ብሰምለ በሊ፡” ቤለዩ።

“ዎይ ኣነ ቀዌ!” ከአፎ ቀደምክ እሰቲ፡ እሰልፍ እንተ ሰቲ።” እንዴ ትቤ አፋህ ጸብጠት ምኑ። እግል ልፈርቅቀ ምንመ ቤለ አቤት እግሉ። እግል ልቀሰበ ሰበት ይሐዘ እንዴ

እበነት ሻም

ትባሸረ ሀበዩ። እንዴ ልትሓወሎ ህዩ ምን ሐሊቦም ጠብ ገብኣው። ምናተ፡ ሐሊብ ሌጠ ኢኮን ለተሓወለው፡ ምስለ ሐሊብ ሻም፡ ዐሸም አድሕድ ወአማነት ተሓወለው። ሐሊቦም ክምሰል ስተው፡ አርበድ እት ገርብ ስተል ትከምተተ። ጠበዐት ወድ-ተብዐት እንዴ ሐሉቲ፡ ህዩ አርወሐቲ እግል ልራቅብ ኢቀድረ። ነፍሱ ሴነገት ወአርወሐቲ ተሓብ’ረ ቲለቲ። ስተል እበ ክልኤ ለእድዴህ እንዴ ሐቅፈቲ ልውሊት ዲቡ እት እንተ፡ “አርበድ ሐቶ፡ ለናይ ደንገበ ምራድክ ምስልዩ ሚ ቲ?” ትሰኣለቲ እብ ክፊነት ድህርት።

“ኣነ ወእንቲ እንዴ ትሃዴነ ምስል እግል ንንበር።”

“እለ ምን ገብእ አትሸንህኒ።” ሸንሂት ዲብ ዓዳት ትግሬ ሰኒ ትርድት ሰበት ቲ፡ እብ ሸፋግ እግል ልብለስ ዲበ ኢቀድረ። እግል መደቲት ለሐሰብ እንዴ ጸንሐ፡ “ሚ እግል ትሸንሂ ተሐዜ ህሌኪ።” እት ልብል ትሰኣለዩ።

“እንተ በሰ አትሸንህኒ፡ ሐቆ ኢተኣትሸንህኒ ህዩ ይኣትሸንህኪ በለኒ።” ብትክት እግል ልብለስ ዲበ ሐዜት።

አርበድ ይኣትሸንህኪ ሰበት ተረደት ዲቡ፡ ፋርህ እት እንቲ፡ “ትሸንሂ ገድም፡” ቤለዩ።

“ኣነ ናይክ ኣነ ወእንተ ናዬ፡ ኣነ እትለ እድንዩ እምበልክ እግል እንበር ይእቀድር። ትምኔቼ ህዩ ዲብክ እግል እውለድ ወግቤቲ፡ ኣዜ ላኪን...”

“ሚ ላኪን? ኣቤ ኣነ ወእንቲ ሞት ሌጣ ተ ለትፈናቲኸ።”

“ከእንተ ኢትትቀጽብ ዲብዬ ሸፋዬ?”

“እንቲ ለቴልክዩ ክለ መዐር ወሰከር ቲ። ዲብ ሚ እትቀጽብ እትኪ?”

“አሰክ ንትሃዴ ሐሰብክ ትጀመል ምንዬ። ክሉ ደሚርዬ ወገርብዬ እግልካቲ፡ ምናተ፡ መትሓባር ሐቆ ህዳይነ ልግበእ!”

አርበድ ሸንሂት ስተል ጸር ክቡድ ገብኣት እቲ፡ ዐሸሙ ሕዱዱ ሓልፍ እት እንቲ፡ ክእነ እግል ቲበሉ ልትጸበር ይዐለ። ምናተ ሸንሂት ዲብ አሰረ ኢበልሶ ሰበት ገብኣት፡ እንዴ ኢፈቲ “ሸንሂትኪ ትትመም እግልኪ፡” ቤለዩ።

ስተል ሰኒ ፋርሐት እት እንተ ወምን ቅያሰ ወለዐል እንዴ ተሐምዱ ዲበ ምልትሐ ሰዕም እንዴ አበለቲ፡ “ምራድክ ርከቡ፡ እንተ እብ አማን ናይ ዮምዬ ወናይ ሓሪቼ እንተ።” ቲለቲ። አርበድ ገድም ነፍሱ እግል ልትሓበረ ትሴንግ ምንመ ዐለት፡ ቆል ሰበት አተ ደሚሩ ህምድ ቤለ። አሰክ እብ ዐቅድ ትትሐለል እግሉ ህዩ ክምሰል ሕቲ እግል ልርኣዩ ምስል አርወሐቲ ገለድ በይኦ። እሎም ክልኣት ሰብ ሻም አክልሕድ ይማሞም ክምሰል ደለው፡ ዲብ ሐንቲለ ምን ብርድ ሕጌ ጋብኣት እግሎም ለዐለት እበነት እንዴ ገብኣው ህጅትም አተላለው።

“እለ እበነት ከአፎ ሕፍንተ!” ተዐጀበት ስተል።

“አፎ ኢተሐፍን እበነት ሻም ተማሚ? ሻም ምን ብርድ ሐፋነት፡ ምን ዝላም መጽሀይ፡ ምን ውሒዝ መዐደይ፡ ዲብ እድንዩ መፈተይ ቲ፡ ማሚ! ወምን ክሉ ህዩ ሻምኪ?”

“ሻምዬ ምን ሻም ብዕዳት ሚ ፍንቲት ቡ?”

“ሻምኪ እግልዬ ጀነት እድንዮ ቲ ወናይ ፈንጎሕ ህዩ ምስለ ካልቅ ህሊት።”

“እላ ቲ!” “ሸክ አለበ!”

“ከምራድክ ልትመም እግልኪ። እለ እበነት ከላሰ እበነት ሻም ሰማኪህ?”

“ሻምነ ለተኣሰሰ ዲበ ሰበት ቲ፡ እብነት ሻም ሳሚህ ህሊት።”

“እንሻለ ሴትራይት ምስጢርነ ወሔፍዛይት ነፍሰነ ትግበእ።”

“አሰክ ቤትነ ነኣቲ ኣነን ህጅክነ ወመሕበርነ እለ እበነት። ስምዲ ስተሊት ገሌ ምን ግድ ደሐን እንቲ ማሚ?”

“ግድመ አዩ ሰርር።”

“ትዘመትነ ኢትብሊኒ!”

“ሸር አለብከ! ክም ምራዶም እንዴ ኢገብእ፡ ክም ምራድነ እግል ልግበእ ቲ።”

“ዓዳት ዐድነ ቃውዮቲ ሚ እንቲ፡ ግድ እብ አማነት ሰበት ልትኣሰር እግል ልትብተክ ኢቀድር።”

አርበድ “ስተል ግድ እሱር ዲብዬ ቲ” ዶል ቲለቲ ሰኒ ደንገጸ። ስተል እግል ትእቤ ምንመ ትቀድር፡ ዐባዩ ቁሎም ሰበት ኢበድሎ፡ እብ ቀሰብ እግል ኢልቀጭቁጪ ሰኒ ፈርህ። ስተል ላተ ብዘሕ ህልግት ይዐለት። ዐድ እለ ቤለው ሊበሎ፡ እምበል ምራደ ወድ-ሓለ እግል ኢትትህዴ ምስል ነፍሰ ሌጠ እንዴ ኢገብእ እግል አርበድመ ገለድ በኣት እግሉ።

እሎም ክልኣት መሳኒት ዲብ ትልህዩ ረብዐት ልትዋጅሆ ወእብ ምሱል ልትሃጀኮ ምንመ ዐለው፡ ምን ልትኣመር ክምሰል እለ ላሊ እለ እንዴ ትለወቀው ሁጁካም ኢልኦምር። እለ ዲብ ሐንቲ እበነት ሻም ለትመዋው እተ ላሊ አክልሕድ ተኣመረው ወተጋቢብ አድሕድ ደለው እተ። ስተል ዲብ ሕቅፍ አርበድ እንዴ ተሐርግዐት ወህቲ እብ ዐሸም ሻም እንዴ ሻምለ ወጣሰሰ ላሊ ሰለሰ እዴህ ክምሰል ጌሳዩ እግል ልዲር ስተተው። ፍንቲት ሰኒ መረት እቶም። ነፍሰ አድሕድ ሐዜት ወምን ህጅክ ጸጊብ አቤት።

አርበድ ምነ ምጅግሐ እንዴ ልትከማክም፡ “ስተሊት፡ ገድም ምድር ጸቤሕ ህለ፡ ገበይመ ረያም ሰበት ህሌት እግል እሳርሐኪ ቅነጺ እግልኪ።”

“ሰርሐ ይሐዜ ኖሼ እገይሱ።”

“በይእ! ኢቤለያህ አዋልደ ድጌ! አሰክ ጀፈርለ ዐድ እግል እሳርሐኪቲ።” እንዴ ቤለዩ ምስል አሰክ ዐድ-ራኪ ትበገሰው። ምን እበነት ሻም አሰክ ዐድ-ራኪ ገበይ ሳዐት ምንመ ገብእ፡ ዲብ ቀበትለ ጽልመት ሐራሰ እት ልትሃጀኮ ወልሄር እንዴ ኢልትኦምርም ስምጥለ ዐድ በጽሐው።

“አርበድ፡ ገድም ኣነ በጽሐኮ ምን እለ ኢትሕለፍ፡ አክላብ ሐቆ ነብሐነ ምሸክለት ቲ።” ቲለቲ ስተል። እብ እዴ ማኑ እንዴ ሐቅፈዩ ልሄርር ለዐለ አርበድ ድንን እንዴ ቤለ፡ “ገድም መርኢትነ እትኬር አሰክ ሰንበት-ዐባይ ሓራት።” ዶል ቤለዩ፡ ስተል ዲበ ምልትሐ ሰዕም እንዴ አበለቲ አሰክ ዐደ ትበገሰት። አርበድ እብ እንክሩ ምድር እግል ኢልጽበሕ ዲቡ ፋርህ እት እንቲ ለገበይ እግል ልጣይም አራብደ።

ስተል እብ ቅሩተ እንዴ ትትጫፈር ወአክላብ እግል ኢልንብሐ እንዴ ትፈርህ እበ ጎሞ ዲብ ቤቶም ተሐልወሸት። አዳም እንዴ ኢልርእዩ ህዩ፡ ምስካበ በጽሐት።

ፈጅር ምድር ክምሰል ጸብሐ፡ አዳም ክሉ እንዴ ትሰለ ክል-ዎርትክ አ’መት ሴሩ ወዴ እት ህለ፡ ስተል ስካብ እንዴ ነስኣዩ እት ተአቦፌ አጽብሐት። አርሄት እብ ስካብ ስተል እንዴ ትትፈከር፡ “ስተል፡ ኢስተል ሚ ረክበተኪ ዮመቴ አፎ ክእነ ቅንጸት አቤኪ? ሰላት አሰቦሕ ገድም ሓልፈትኪ ህሌት፡ ኣዜ ትሰለይ ቀብራታይ ኢትገብኢ።” ቲለቲ።

“እስታቅፍረለ! ይመ ረአሼ ለሐመኒ ትመዩ፡ ግውሐት ቲ ስካብ ለነስኢኒ።” ቲለተ ዲብ ተኣትመሳምሱ፡ እንዴ ቀንጸት ህዩ፡ ባካት አዳሕዩት እግል ትትሰሌ ትወዴት። ስተል እለ አምዕል እለ እብ ሕማም እንዴ አመሰመሰት ክለ ለአድሐ እት ትሰከብ ወዐለት። ክሉ ምስል አርበድ ትትሃጀኩ ወትወድዮ ለዐለት እንዴ ልትረኣዩ እብ ክምሰልሁ አሰክ ሚ ዶል እግል ተኣተላሌ ክምሰል ትቀድር ፈርህት በኣተ። ምን ሻም አርበድ እግል ትትናዘል ክምሰል ኢትቀድር ላተ እብ ክሉ ደሚረ ሰበት ቀረረት ግረ እቅባለት ክምሰል ህሌት እግል ረሐ አተበተት።

አርሄት ልታመት ሐሪር እንዴ ተዓርር፡ “ስተል ሕልብዬ ሰደይክ፡ ሓሎታትኪ እትሊ ቀይም አትህዱነ ልብሎ ህለው ወሕነ ዱሉያም ይህሌክ፡ ኣዜመ ብዘሕ ታርፍነ ህለ።” ዶል ቲለ፡ ስተል ዲብ ገርብ ሲያር ትጋዮሰ።

“እሰዉ ቀይም? እሊ ክልኣት ወሬሕ ታርፋ ለህለ?” ትሰኣለት ስተል ድንግጽት እት እንተ።

“ኣቤ፡ እሊ ቀይም እሊ። አምዕል ለኣክል ለኣትዩ እግል ልህደው ቲ። ኣዜ እንቲ ሕልብዬ አፎ ገሌ ኢትወዴ። እንኪ እሊ ገኖ ሳይሪ እግልዬ። መንሸጥ እግል ንውዴ ወመሸዐሊብ እግል ንሸቄ።” በልሰት እም-ስተል ግድዐተ እንዴ ትሸፈሕ። “ይመ፡ ኣነ ሕምት ሰበት ህሌኮ እዘሚ ምንዬ። ህቶም ዐድ ሐኪ ሚ ተህፍቶም ህሌት? እሊ ቀይም እሊ ላቲ ሓሉፋ ቦሎም።”

“እግልሚ? በዲር ትዋፈቅነ ማሚ፡ ሓልፎ ይእንብሎም። እምበል እሊ ሸቅለ ቤት ብዕደት ሚ ታርፈትነ እንዴ ህሌት። አቡኪ እክል ምን ገብእ ወወለፍ ክሉ እዱሉይ ህለ።”

“ይመ፡ ኣነ እሊ ቀይም እሊ ላቲ ይእትህዴ፡ እግል እጽንሕ ቲ።”

“እኩይ ረከብነ! እለ ከአፎ ትቢለ። እሊ ቀይም እሊ ኢነኣትህዴኩም ሐቆ እንቤሎም፡ ዱሉያም ሰበት ህለው፡ ወልዱ ምን አዋልድ ሐሁ እግል

ልህዴ እግሉቲ።”

“ሰኒ ወደ፡ ያሬት ወሀደ እግሉ!” ስተል ፈርሐት ትሰምዐተ አማን እንዴ መሰለዩ።

“ወለት አብዬ ፋርሐት ኢትግብኢ! ወልዬ ቀጣብ ሚ እንዴ ጋብእ ቲ። ሕነ እብ ተመኒት ሃይባምኪ ቲ ህሌክ። እለ ህግዩ እለ አቡኪ እግል ኢልሰምዐ አፋኪ ጽበጢ። ግረ እለ ኖሱ እሊ ትልህያታተ ረብዐት ወሀድዮት ተሓገሉ። ገድም እንቲ እግል ምርዒነ ትዳለይ። ሕነ እብ ሸረፍኪ ቤትኪ እግል ነኣቲኪ ነሐዜ።” እት ትብል መክረተ።

ስተል እግል መደት ቲእ ሐቆለ በጥረት፡ “ይመ፡ ኣነ አሰእለኪ ህሌኩ፡ እሊ ቀይም እሊ ይእትህዴ፡ እግል እጽንሕ ቲ።” በልሰት ዲበ ምን ሐዲሰ።

“ተኣቢ ህሌኪ?” ትኸደት አርሄት።

“አቤ ይህሌኩ፡ ህዳዩ ሐጃጅ ሐቶ እግል ልሕደሩ ሐዜ ህሊት። እትሊ ቀይም እሊ ሐቆ ወዴናሁ እግል ልምጸእ ኢኮን። ሰነት ሓራት ላተ እግል ለዐሬ ቀድር።”

“እንቲ ወለት! ሐጃጅ እናሰ አብ ዕያል ቲ። ዲብ ሶዳን አሸቃሉ ብዘሕ ቲ። ኣዜ እንዴ ጋንሐነ ሰበት ጌሰ ለዐሬ እብኒ ኢመሰሰኒ። ሕነ ህዩ እግሉ ተኣትጸብር አለብኒ።”

“አሰእለኩም ህሌኮ ህቲ እንዴ ኢመጽኦ ኣነ ይእትህዴ።” ብትክተ አሰኣለተ እንዴ ትትነዋኔ።

ስተል ወቅት እግል ተኣትራይም እንድኢኮን፡ ሕዱር ሐጃጅ እንዴ ሐዜት ኢኮን። ሐጃጅ እብ ዕያሉ ዲብ ሶዳን ሰበት ነብር፡ ወዲብ ወቅት ቅሩብ ጉንሐም ሰበት ዐለ ክምሰል ኢመጽኦ እንዴ አከደት ቲ። ሓጽያመ ለዐለው ዐድ ሓለ ህዩ፡ እሊ ቀይም እሊ ሐቆ ሓለፈው ምኖም እንዴ ትደመለው ብዕደት እግል ልህደው እንዴ ትቤቲ ተኣትመሳምሰ ለዐለት።

ስተል ወእ’መ እለ አምዕል እለ እት ልትከሐደ ምንመ ወዐለዩ፡ አርሄት ጠለብ ስተል እድሪስ እግል ተኣሰእሉ ይሐዜት። ምንመ ተኣቤ እለ ትበጹሕ አለበ እንዴ ትቤ ዲብ ወራተ ገብኣት። ስተል እት ፍንጌ መጥሐን ወወለተ ተሐኔት - ፍንጌ ሻም አርበድ ወሀዳይ ወድ-ሓለ። ምን ክሉ ወኬን ለኣፍርሀተ ህዩ እግል ትትህዴ መትዳላይ ገብእ ሰበት ዐለ፡ መራቀበት ትርድት እግል ኢትገብእ ዲባ ቲ። እለ አምዕል እለ እት ረኣሰ ዐዛበ ዐዛብ ትወሰከት እተ። ህዳይ ሐቆ ገብኦ ፍንቲት ምን አርበድ መረት እተ። ለህጅኩ ጥዕም፡ ለብጥረቲ ኦጋይት፡ ለመካይዱ ጣፍፍ ወክሉ መጥዲቲ እት ገጸ ትጋዮሰ። ለሳምን ህዩ ኣክል ሰነት ገብኣት ዲቤ። ዲብ እበነት ሻም እንዴ ትዋጅሀው ለቴለል እግል ትድገም እግሉ ወእንዴ ገመው በሰር እግል ልውደው ሸፍገት።

ስተል እብ ሀማት ለሸመተ ሳምን አምዕል ከእግል አምዕል እንዴ ትዳገን ክባባይ ገብኣት። ሰንበት-ዐባይ ህዩ ክምሰለ ኣዩደ ጸብሐት ወመሴት። አዳም ክሉ አልዕሻሁ እንዴ ትሰለ ክምሰል ሰክቤ፡ ስተል ክምሰል እዩደ አሰክ እበነት ሻም ትበገሰት።

ልተላሌ.....



ሰዳይት፡ ትሰምድ ድኢኮን ኢተኣትናብር

ግደይ ምሑስ እት ተሰነይ ለትነብር እት ንዳል ጀለ ተሕሪር ለመሰከነት ሙናድለትተ። ምስክናህ ቀሊል ኢኮን። ሐቲ ዕንተ ጌሰት፡ እገረ፡ ዔጸተ ውብዕድ ገርብ

ምነ። ግደይ እብ ሰዳይት መሕበር ወጠን አዋልድ አንሳት ኤረትርየ ወመሕበር ምስኩናም ሐርብ ምስል ሳልስ ረአስ ክም መጅሙዐት እንዴ ትከምከመየ ሐቲ እግለን ለተኣናብር



አሰይደ ግደይ ምሑስ

መዳሚዕ ህለ እቲ። እለ ምስክንት ሙናድለት እለ እም ሰስ ውላድ እት ገብእ፡ ውላደ በይነ አካን አብ ወእም እንዴ ደብአት ተዓቢ። “አዜ ገድም እኪትቼ ሓልፈት ሀሌት፡ ለክልኤ ዐባዩ ሁዱያት ሰበት ገአየ ረሐን ካፍያት ተን፡ አዜ እት ሐንቴዬ ለሀለው አርበዕ ቶም” ትብል ግደይ። እለን ለዮም ሰብ ፈረዕ ጋብኣት ለሀለየ ወለ ምንን ልንእሾ እግል ተዓቢ ላኪን መንበሮ ሰኒ ክብድት እት ዐለት። መሕገዝ ሰዱ ሓልፍ እት ዐለ። ምናተ ሰእየት ለኢበትከ ባባት ኬር ኢልትዳበእ

ጣሑነት ወደየ። እለ ጣሑነት እት ሰልፈ ሰኒ ሸቂት እለን ወዕዳየን ምኑ ገሌ ክም ፈደየ ለተቅዩር አግሩሽ ነቅፈ መጽአ ከሄራረን ምነ እለ ዐለ ብርድ ወደ። ህተን ላኪን ዲብ ዕዳየን እግል ልስከበ ሰበት ኢሐዘዩ፡ እለ ትጸገመየ እንዴ ትጸገመየ ዕዳየን ፈደየ። ምን እለ ወሐር ለልኣትያህ እት ጋሪት ርሐን ምን ኢገብእ፡ እት መእወድ ለትገይስ አለበን። ምን እለ ጣሑነት መንበሮህን ሐሰት፡ ድራረት ላሊህን ሀዩ አክልሕድ መልከዩ።

እግል ሸቃለ ለለፈግራሁ ማል አለበን፡ “መስከን ወሐለት ሸቅል

አለብን” እንዴ ኢልብለ፡ ምን አርድ ጸ’ቤሕ አስክ ለልትጠሐን እክል ለአተመ ኖሰን ሸቅዩ። ውላደን ምስል ምህርሆም ዲብ ለአትመሳት ሰድወን። ዮም ለሳልሳይተን ዓፍየት ሰበት ኢረክበት ምስል ዐደ ሳክነት ምንመ ሀሌት፡ ለሸቅል እበ ሀለየ ገይስ ሀለ። ህተንመ ጸረን እግል ለአቅልላሁ ለሐሰበ ሀለዩ።

“ሕናመ ምስል እሊ አዜ መጽእ ለሀለ አግቡይ ሸቅል እግል ንትላፔ ለሀሌት እነ መቅደረት ለትረዬሕ ሰበት ኢኮን፡ ለሸቅል ውላድነ እግል ነሓልፍ እቲ ነሐዜ ሀሌን። ሕነ ምስሉም እንዴ ገብአን እግል ንምረሐም ወንስደዮም ሌጠ ነሐሰብ ሀሌን” ትብል። እሊ ለአብለ ለሀለ፡ ውላደን ነኣይሽ ሐዳይስ ሰብ ሐለት ወፍክር ቶም። ምስሉመ እብ ተዕሊም ሰኒ ወአማን ሰበት ለሐይሶ ምን፡ ለለኣቲ ወፈግር ማል፡ መክሰብ ወከሳር፡ እብ ወሳይቅ እግል ልጽበጦ፡ እት ብነክ ለልትጠለብ ናይ ውራቅ አሽቃል እንዴ ፈሀመው እግል ልሰርጉሎ ቀድሮ። ህተንመ ዕርፍ ረክበ።

አሰይደ ግደይ ምሑስ ብዙሕ ለትደጋግመ ወለትጨቅዋ ዲበ ህግዩ፡ “አዳም አፍካሩ ኢልመስክን ድኢኮን፡ ገርብ ምን መስክን ድራረት ላሊሁ ኢተሐይሎ” ለትብልተ። እትለ ከርሱ ይእቀድር ለትብል ፈርሀት ወፍክረት ሐዋኒት ሀሌት ምንገብእ ምን ሰድዎመ ኢቀንጽ። “እግል ኢዴ ቱ” ለልብል ላኪን ለእለ ረክብ ሰዳይት ምን ምውዳቁ ተሀርሶ ወክም ቀንጸ እብ ኖሱ ገይሱ። ሰዳይት ዲመ ኢተኣትናብር፡ ሐቲ ዶል ክም ሀረሰውክ ዲመ ዲብ ዳግፋክ እግል ቲጊስ ወግረ እግል ትዋለብ አለብኩ፡ እብ ኖስከ ሐቆ ግስነቲ ሀዩ ለሴድያይ ፈኩ ለትፈድዩ ለልብል ረአይ ብእተ።

ዎሮ ዕቁድ እት ብትር ምግባይ ዳይነ

ዳይነ ምን ገብአት ዐስር ሰነት ግራህ አዶረተን። ዲብ ዳይናመ ምግባይትተ፡ ለዝያድ ሐለት ቀራር ለመልክ ዳይነ። ህተ ዓይኖም ተኽሌ መብራህቱ ትትበሀል። ወለት 12 ሰነት ዲብ እንተ ምን ሕምብርቲ ዲብ ጀብሀት ተሕሪር ኤረትርየ ፈግረት። ምተሐት ዕምር ሰበት ዐለት ዲብ መድረስት አቲት፡ ሙናድሊን ክም እም ወአብ እንዴ ገብአው ዓበወ ወዐለመወ። ሰነት አዳም ክም በጽሐት ሙናድል ክምሰሌህ ተሀዲት ወክም ሐወ ወሐዋተ ዋጅብ ወጠነ ዲብ ትወዴ እብለ እት ተንዚም ጀረ ቴለል ሱዳን አቲት። ምኑመ ምስል ሕርየት ዐደ አቲት ወምስል ዕያለ ዲብ ተሰነይ ሐድረት። ዲብ ቀበት ገቢለ ክም መዋዋነት ዲብ

መሓብር ገቢል አግደ ሀዩ ዲብ መሕበር ወጠን አዋልድ አንሳት ኤረትርየ ምነ ለልትሐዜ ዲብ ተአገዴ፡ እት መሕከመት ‘ድጌ ሰውረት’ ለልትበሀል ሐይ ተሰነይ ሸዑብ ሐረየ። እብ አሳሰለ እሉ ረክበት አለዋት ሀዩ ምነ ሰለሰ ዳይነ ምግባይት ዳይነ ገብአት።

አሰይደ ዐይኖም እትሊ ናይ ዐስር ሰነት ናይ ሸቅል ተጃርብ አንሳት እብ በራኣተን አው ሰድ ለተሐልፍ እምነተን ለዋጅህን መሻክል ብዙሕ ለአግህዩ። ተሰነይ ወባካቲ አርድ ሐርስ ወተጃረት ሰበት ገብአ፡ አዳም ምን ረዩም ወቅሩብ መጽኦ። ገሌ በዐል መስከብቲ ወገሌመ እንዜ ወኬን ለልብል። ገሌ ሀዩ አስክ ሕዱድ ልትዐዴ እግል ዶሉ ዲቡ ለሰክን ቱ።

ብዙሕ መራት ምነ ሳድፍ እግለ ሸሪክዬቱ ለልብላሁ ሰኒ እንዴ ኢለአምራሁ መትቃራን ወአረይ በረ ወዋልም ግብአትቱ። ብዝሓም ተብዕን እት ካልእ አካን ዕያል እት ቦም እንዴ ሰትረው ምነን ክም ቀሩብን ወክም መደው ረአሶም ክም ሸርቦ፡ እንዴ ወልደው እተን ለኢሸርፎ፡ እንዴ ወልደው እተን ለልትበረው ሀለው። እሊ መስል ብዙሕ ሳድፍ። ምን እሊ መስል እግል ልትሰለመ፡ ለገብአት አንሳይት ለምስሉ ትቃረን ሀሌት ሰኒ እግል ተአምሮ፡ ገበይ ቃኑን እንዴ ኣመረት ሐቀ እግል ተአርቴዕ፡ ክለ ሰፈቱ ኣምረት ዲብ እንተ ሕርያነ እንዴ ገብአ ሸእገቱ ሀሌት ምንገብእመ ሚ ክም ትመጽኦ ወክፎ ክም ትዋጀህ

ዓመት ኬርነ ግብኢ

2018 እለ መጽኣትተ ንትከበተ ወንደሐር እት ጽምኣም ረዉ ወሕጉዛም ረቱዕ እት ጀሀል ሰርት ወዕልም ለአማድድ እተ። አንሳይትነ ለትወቅል ለዐል ለተኣብለ ርዝቀ ዘይድ እተ፡ ሰዓደትመ ምስለ ልበ ሳክብ እለ፡ እት አካን ሸቅለ። ውላደ ሐበን፡ ኢኮን ክቡድ ጸረ ኩሉ ለአተብርየ፡ ሰብኦ ወሰብ ጸረ ፍሬ ርሕመ ምን ገብኦ ለዐድነ ዐመረ። ብርሃነ ዳምቅ ሀለ - እለ ሰነት ሐዳስ ሐጽረት ትነወከት - ምን መንገአት ዐቦት አሳድሪ ገንድሊ፡ ዓብየ ለሐዘት። ጸገምኪ ንዳልኪ ፍሬሁ ወጀበ ረአስኪ ርፍዕዮ አንጽሪ ለዐበ ሀሌኮ በሊ- ሽሂዳትኪ ልሰክበ። ዓመትነ ተኣበክት እለ ሰነት ሐዳስ ሰነት ኬር ወበርከት- ሰነት ሐበን ወፋሽ ሰነት ወቀይ ዕዉት- ሰነት ፈረሕ ወዕላል!

ከልሹም መሐመድ ደባሳ

እንዴ ደሌት ወትዳሌት እግል ትእቲ ክምበ እት ልበ አውደዮት ሰኒቱ። እትሊ ለሰዴ ተዕቢኣት እብ መሕበር አንሳት ውብዕዳም ለኸሰሶም መኣሰሳት ቃኑን እግል ልትሀየብ ምህም ክምቱ ተኣትፋቅድ። ህተንመ ለገብኦ ምስል ቃኑን ለልትጸበዋ ቀድያት ዶል ሳድፈን፡ አምር ኩሉ ክም ትከለስ ወገበዩ ክም ትሸናኬት ሐቅዬ ኢረትዐ እት ልብለ ማይ እንብዐን በደል ልትሓወለ፡ አው መሕከመት በደል ለሐምዩ፡ ምን ቀዳመን ምክር ቃኑን እንዴ ጠልበየ እበ ገበይ ለራትዐት እግል ልትቃረመ ትትላኬ።

እትሊ ናይ ዐስር ሰነት ተጃርቦ፡ አንሳት ዲብ ዳነዮት

እብ ሸዑብ ሕሙዳት ክምተን እግል ትሸሀድ ለተቀድር ቀናዐት በ። እለ ሀዩ ግምሽ ለረክበያህ ቂመት ኢኮን። አሰይደ ዐይኖም እብለ ሸሀደተ፡ ለእሉ ከድመ ሸዑብ፡ ምነ ቃኑን ለልብለ እንዴ ትሸንከየ እግል ዎሮመ ክም ኢገዘዩ፡ እብ ክነ ውብለዕ ክም ኢልትቀሸሽ እብ ዐመል ምን ረአየንቱ። እት ደንጎበ እለ ዳይነ፡ “ሕነ አማነት ብነ፡ ለሐውነ ወሐዋትነ ጀለ ዐድል ወመሳዋት አስተሸሀደው፡ እት እለ ሀለው ጋኖም እግል ልስከብ፡ እት ክል አካን ናፍዐት ሀለዮትነ እግል ነኣሰብት ሰበት ብነ፡ እለ ለሀሌት እግልነ መሻረከት እብ ዕጽፋት ነዓብዩ “ ዲብ ትብል ልእከተ ሓለፈት።



ዳይነ ዓይኖም ተኽሌ መብራህቱ



ቀደም ስነት ገብኤ፡ አንፋር እዕላም ሰውረት ዲብ ሐረት ውዛረት እዕላም ቃዕት ሃገር ሚድዮ፡ ናይ ወሰቅት ውሓከዮት ተጃርብ ወዕላ ዋድያም ዐለው። ዲቡ፡ ለበዲር ዲብ ሚዳን ለዐለው ሱሕፍዩን ወፈንዩን እዕላም እንዴ ትጀመረው እብ ሰበትለ ልትነሽር ለዐለ ክቱብ ክምሰሁ ሰወር እት ወክድ ንዳል ወዘያደት ክሉ ህዩ እብ ሰበት መትኣሳስ ክርን ገቢል ናቀሸው። እተ ወዕለ መትኣሳስ ክርን ገቢል ለከሰስ ምን መእስሰት ወመኣንብተት ላዮም ዎሮ አሰይድ አሕመድ ጣህር ባዱሪ ዐለ። አሰይድ አሕመድ ጣህር ባዱሪ እብ ሰበት ተእሲስ ክርን ገቢል ዲብ ልትሃጌ እብ ክእነ ፈሰለዩ፡

እዕላም ወደዓያት ክምሰል ዎሮ ምህም መጃል ንዳል ክምሰል ዐለ ቅወይ ኢኮን። ወራታት እዕላም ህዩ እብ እስትሸሃድ ወእብ ጸገም ትሩድ ምን ወቅት ዲብ ወቅት ዲብ ልጠወር ጌሰ። እሊ ታሪክ እሊ እብ ሐድ እብለ እትሊ መጃል እሊ ለሻረከው ወዲበ ሸቅል ተረት ለዐለት እሉም አንፋር ልደገም ዐለ። ሸቅል እዕላም ህዩ መክ ወጅህድ ትሩድ ለጠልብ ወቀይ ሰበት ገብኤ፡ ገጽ ግረ እንዴ አቅበልን ዶል ነኣትዋይ፡ ለዲብ መደት ንዳል ለትክሰበ ተጃርብ ወሰተሐለፈ ታሪክ እብ ቀለ-ቀሎ ለልትራኤ ክም ኢኮን ሸክ ይእንወዴ። ኣነ ህዩ እብ ሰበት ተእሲስ ክርን ገቢል እግል ሓኪ ሰበት ተዐደምኮ ወታሪክ ክርን ገቢል ፋዬሕ ሰበት ገብኤ እንዴ አትሐጨርኮ ክርን ገቢል ኤራትርዮ ከፎ ወምዶል ወእተየ ወሚ ዶር ተልሄት? ምን ተጃርብዬ ወተጃርብ መልሂፎ እግል ሓኪቴ። ክአሰፍ እብ ሰበት ተእሲስ ክርን ገቢል እግል ንርኤ።

ክርን ገቢል ኤራትርዮ፡ ሐቲ ክትፈት ናይለ ብዙሕ ወራታት ኦትፋዘዎት እት ገብኤ፡ ዶር ዛይድ ለዐለ እለ ክፋል እዕላም ወደዓያት ተ። ላኪን እለ ምስተንክራይ ወቀይ ለአውቂት ክርን ገቢል፡ እብ ከአፎ አንበተት፡ ምን እየ በቅለት? ፈሰርት እግል ኖሱ ዐቢ ተፋሲል ወሐብሬ ለተኣትሐዘያ ተ። ክርን ገቢል አሰልፍ ክምሰል ፍክር ዐለት፡ ሰውረት ኤራትርዮ ናይ ኖሰ ራድዮ እግል ለህሌ እለ ምን በዲር ልትበህል ለዐላቴ። ላኪን ሕፋር ምድር ወሳብት ደን ወካፊ ኣላት ይዐለ። ክምሰል ፍክር ላኪን ምን ረዩም ወክድ ለዐላ ተ። እሊ ጀብህት ሽዕብዮት ተሕሪር ኤራትርዮ ሌጠ እንዴ ኢትገብኤ፡ ጀብህት ተሕሪር ኤራትርዮም ክምሰልን እንዴ ሐሰበው ወእንዴ በድረውን ትራንስሚሽን እምቡታም ዐለው። ላኪን



ምን ባሕ እት ፈሕ!


ኢሳምን ወኢኣምዕል ሽብብ እንዴ ቤለ ረምሽ።

ለዲብ ጀብህት ሽዕብዮት ለዐለ እዕላም ወደዓያት ላኪን፡ መኣከብ ወመከምከም ተ። እሊ ህዩ አባይ እግል ልርከቡ አው እንዴ አሰረ እት ሐብስ እግል ልክረዩ ለኢቀድር መሻቀዩ ሰበት ገብኤ ለሕርያን ወለደቅብ ህቲ ተ።

ሬድዮ ክርን ገቢል ኤራትርዮ ዲብ ሰነት 1979 ሐቀ እንሰሓብ እስትራተጂ ዲብለ ዐለ ወክድ፡ እግል አሰልፍ ክምሰል ፍክር ለዐለ እብ አመተ ኢተአመረት እት ፍዕል ወዐለ። ለእብ ሰበት መኣምበት ክርን ገቢል ለዐለ ዮም እግል ትዳግም እቡ ደኣል አው ሐካኪቶ ቱ ለመሰል። ላኪን ሐካኪቶ ኢኮን፡ አማን ተ።

ቀደም እሊ ወክድ እሊ ዲብ ፈሕ እት ሕነ ክምሰል ከረ መሕተ በህለት ሽራረት ላቱ ወብዕድ ለትፈናተ መናሽር አው ክቱብ ልጠበዕ ዐለ። ቅስም ሞባዕትን ህዩ ዲብ ለአሳድር ልሄርር ዐለ። ላኪን ክርን ገቢል ምን ፍክር እንዴ ሐልፈት እብ ከአፎ ዲብ ፍዕል ወዐለት እት ልብል ሰኣል እብ አማን ምስትንክር ወዐጃይብቱ እግል ልትበህል ቀድር። ቀደሙ ቅዋት ሽዕብዮት እት ህሌነ ዑሰማን ሳልሕ ሰቤ ምን ማርኮኒ ሐቲ ትራንስሚሽን ራድዮ እግል ልትዛቤ 250 አልፍ ዶላር እንዴ ትበህለት ቀሌት እቱ ከአዝመ ምኢ። እተ ወክድ ለህይ ላኪን ሬድዮ ምን ትትረከብመ፡ አራዲ ሕፋር ልግበእ ወሳብት ድጌ ሰበት ይዐለ እተየ እግል ትውተደ? ሞባይል በህለት መትሐርካይት እንዴ ገብኤትመ ምን ኣካን ዲብ ኣካን እግል ትግዐዝ ወትንክስ መዋሰላት ይዐለ ወእስቤራት።

ሰበት እሊ፡ ክርን ገቢል እምበለ



ለህሌነ ለንዩት ወዐሽም ሌጣቱ ለዐለ ዲኢኮን፡ አርደት ጣፍሐት እለ ይዐለት። ሐቀ ተሕሪር መዳይን ዎርዎር ጸገም ገብኤ ዐለ። ላኪን ሽዑብ ልቡ ዕመም ምኡ ዲብ እንቱ ሬድዮ እግል ትዛቤ ወእሸትራካት ኦትፋግር እግል ቲብሉ ክሉ ረኣሱ ኢገብኤ። ምናተ ጀብህት ሽዕብዮት መሐጠት እዛዕት እግል ተኣሰስ ትጸገመት። ምናተ ለጸገም ዲብ ሬድዮ ሌጠ ለኣተንክበ ይዐለ።

ሬድዮ እንዴ ተክልን ትራንስሚሽን እንዴ አንበትን ክርን ዲበ ትትበጸሕ እግል ነኣብጽሕ ቀለል ሸኢ ኢኮን ለዐለ። እሊ ህዩ፡ መታክል ወተሐዲ ዐቢቱ ለዐለ። አግደ ወናይ እስትንብረት ህዩ ለመሻቀዩ ወእግሉ ለትገብኤ መቅድረት አዳም እግል ኖሰ ቀላል ይዐለት። ክሉ ሸኢ ሰዱድ ቱ ለዐለ። ሰበት ሬድዮ ትተወበት ምንገብኤ እብ ምን እግል

ትትመቃረሕ ቲ! ዲብ ክእነ ፍክር እት ህሌነ፡ እንሰሓብ ሰበት ዐሬኑ፡ ለዐለ እግልን ናይ መራክዝ ራድዮ እትሳል እብ ሰበት ናይ ትራንስሚሽን ልግበእ ወራድዮ እግል ልባሰር አው እግል ልሸቄ ልትሐሰብ ዐለ።

እተ ወክድ ለህይ ልዘረኒ፡ ዲብ ፈር ወንተር 1979 ዲብ መደት እንሰሓብ አው ዲብ ግርበት ሰነት 1978 ዐፍሸት ብዙሕ ምን ካርጅ ማጽእ ዐለ። እሊ



ህዩ፡ እግል ቅስም ሬድዮ ወሲግናል እንዴ ትበህላ ቱ ማጽእ ለዐለ።

ለወክድ ለዲቡ ሸቄ ለዐለው ከረ ስምኡን ወሸሂድ ምሕረትኣብ ለዐፍሸ እግል ልፈቱሹ አስተብደው። ዲብ ፈትሾ ሐቲ ክርቶነት ለትመሰል ኣለት እት ምግብለ ዐፍሸ ጸንሐቶም። ለረክበወ ሰንዱቅ ለትመሰል ኣለት ምን ረኣው፡ ሬድዮ ትራንስሚሽን ለልብል ክቱብ እት መቅጠን ላዋእ እተ ረኣው። አልምህም ለጅማዕት እግል መስኢኖም 'ምስለ ማጽእ ለህለ አግርበት ሐቲ ሬድዮ ትራንስሚሽን ጸንሐተን' እንዴ ቤለው ሐበረው። እለ ህዩ ሬድዮ እትሳል አው ሬድዮ ህለው እንዴ ኢትገብኤ ትራንስሚሽን ተ።

ግረ እለ አምጽአወ ትበለው። መጽኢት ህዩ። ስሜታ አሰክ እለ እዘከረ ሶመርካምፕ (SOMMERKAMP) ትትበህል። አውት-ፑትትወዴ። ሐድ 250 ዋት ተገብኤ። ኣዘ እለ እብ አማን ሬድዮ ገብኤት ምንገብኤ ንጀርባ እንዴ ትበህለ ምሕረትኣብ መጽኢ

እቤ። ክሉም ክምሰል ገንሐወ ላኪን 'ሚ ሐለት በ? ምን እለ ፈሕ ለኢተሐልፍ' ለልብል ረኣይ ዐለ እሉም። አልምህም ጀህድ ገብኤ፡ ለኣንቴነ በህለት አርዮልመ ጠወረው። ለተክኒካይ አሸዩእ እንዴ አትሳነውም ደማን ይዐለት እለ። ምናተ ወለ አሰክ እምህሚሚ ምን በጽሕ እግልን ለዲቡ ህለ አጅህዘትን እግል ልሰመዕ ቀድር ወለ ዲቡ ለህለ ሽዑብናመ እግል ልሰመዐና ቱ ትበህለ።

ግረ እሊ ጸገም ወብሰር እሊ ሸሂድ ምሕረትኣብ እንዴ ትሰርገለ ገሌ ኣትሳናይ ክምሰል ወደ እተ፡ እሊ ግራብ እሊ ንጀርቡ ትበህለ። ትራንስሚተር ክምሰልተ እንዴ አከደው ህዩ መቅደረት ሐቲ ኪለዋት ተ። ላኪን እብለገብኤ ኣንቴነ እንዴ ወዴን ንጀርባ እንዴ ትበህለ ተክለት። እተ ወክድ ለህይ ለዲብለ ትፈናተ ኣካናት

ለዐለ ሬድዮታት እትሳል እንዴ ተሐበረው ዲብ ክእነ ፍረክዌንሲ (FREQUENCY) በህለት ሞጃት፡ እት ክእነ ሳዕት ሬድዮ እንዴ ወለዐኩም ለእነሸሩ ሐልዮት ስምዮ እግልን እንቤሎም። እብ ክእነ ሓሳት እብ ትሉሉይ ዲብ ነሐብር እብ ዶልዶሉ ረድ ፍዕል እግል ንርከብ ቀደር። አሰልፍ ምን እምህሚሚ ስምዐናህ ማሚ ልብሉ። ሄየእ! እምህሚሚ ሐቆ በጽሕ እላመ ሐቲ ምስዳር ገጽ ቀደምተ። ሐቆሁመ ምን ከሰስ ቅብለት ምን አሰመረ ስምዐናኩም ማሚ ለትብል ልእክት መጸኢተኒ። ማሸአለ



ክላስ ክሊን ለዘዐት ለዘተ አዳወርነ ወትከበትናህ ወምን እሊ ወክድ እሊ ወሐር አሰክ እሊ ሃድል ዮም ስሜተ ክርን ገቢል ኤራትርዮ ገብኤት።

ክርን ገቢል ኤራትርዮ ህዩ ምን ዮም 01-01-1979 እንዴ አንበተት ዲብ ታሪክ እግል ክልኤ ምዕል ለትሰረረተ እንዴ ኢተኣትካርም እበ ትውቀለ ጀላል ወሰሰት ተኣተላሌ ህሌት። እንዴ ቤለ ለዲብ መኣንበት ክርን ገቢል ለዐለ መታክል ወአሰቡር እብ ከአፎ ክምሰል ትፈተሐ ሓክ እግልን አሰይድ ባዱሪ።

አማንቱ፡ ክርን ገቢል እሊ አሰይድ ባዱሪ ለቤለዩ መታክል ወተሐዲ እንዴ ተዐርፊት ሄለል ወሬሕ ሐቲ ናይ ሰነት 1979 እት ፋሕ ተኣሰብዴ እት ህሌት፡ እብ ክልኤ ህዘዩ ዐረቢ ወትግርኝ አንበተት። ሐቆሁ እብ ዶልዶሉ ዐሸም ሽዑብ ኤራትርዮ እግል ተኣርሄ፡ ትግሬ ወዐፈር ወሰክት፡ ክምሰልሁመ፡ ሽዑብ ኢቶብያመ ክርን ወንዳልን ጀላብ እግል ለኣምር እንዴ ትበህለ እብ ህዘዩ አምሐርኝ አንበተት፡ እት ሰነት 1987 ህዩ ህዘዩ ኩናመ ወሰክት። እሊ ልትበህል እት ህለ ክርን ገቢል ስዑባት ብዙሕ ተሐመለት። እት ሐንቴ ዕጩይ ወድበዕ ክምሰልሁመ ዲብ ክርስ ምድር ለተሐፈረ ከናድግ እንዴ ገብኤት ክርንተ ወቀለት። ለዲብ ፈሕ አስተብዴት ክርን ገቢል፡ እብ ሰብሰ እንሰሓብ እስትራተጂ፡ እግል ሰሰስ ምዕል እንዴ አትካረመት፡ ዲብ ዐምበርብ ቱንደተ ተክለት ወሸረተ ሓላፊት። ምኡ አሰክ አራግ ነክለት። ምን አራግ ዐምበርብ አቅበለት፡ ምን ዐምበርብ ዐሬርብ ወእብ ፍንቱይ ረኣሰለ ሻንን ደብር ሀገር እንዴ ዐርገት አሰክ አምዕል ሕርዮት እት ሕፋር አራዲ ኤራትርዮ ክርንተ ወቀለት። ምኡ ነቅፈ እግል ትእቲ ዲብ ትዳሌ ሕርዮት ሰበት መጽኢት። ምስል ሕርዮት አሰመረ ዓረት። ዲብ አሰመረት ህዩ ታርፍ ለዐለ ሀገጊት ኤራትርዮ እንዴ ወሰክት ዮም እበ ሴዕ ሀገጊትን ትትሃጌ ህሌት።

ምን ሕበዔ ወኣንጎጋይ እት ከደን እንዴ ትባለሐት ህዩ፡ እት ረዋሺን ሰክነት። ምን አናሎግ ዲብ ድጂታል ተዐዳት። ምን ሽወሽረት ወቅርብ ህዩ ዲብ ሳተላይት እንዴ አቲት ምን ቀበት ዐድ እንዴ ሐልፈት ኣብሐር ወምሐጣት እንዴ ተዐርፊት እት ክለ ዐለም መጦር ክለን እዛዓት እንዴ ትረተበት ልእክተ ተሓልፍ ህሌት። ሐምዴ እግል ረቢ ወእግለ እብ ከም ጅርበት ወብሰር ምን ባሕ እት ፈሕ እንዴ አስተብደው እትለ ደረጃት እለ ለኣብጸሐወ ፍራሲ-ምሔርበት።



ሰነት ሐዳስ ምስል ነቲጀት ሐዳስ

መርሐባቦም አውኪራም ከአፎ አስመንክም። ሰነት ሐዳስ ከአፎ ትከበትኩመ እንሻለ ሰነት ኬር ወበርከት ወሰነት ሰላም ወዓፍየት ሊደየ እግልክም። ሰነት ዲበ ትፈርሖ ወዲበ ትነጅሖ። ሰነት ወቀይ ወፍሬ። ሰነት ዐማር ወከማል ሊደየ እግልክም እንሻለ ውላጄ አውኪራም።

አሚን አቦነን ዳፍአት። ሰነት ሐዳስ ስኒ ፋርሓም ወልወቃም እት ሕነ ትከበትናህ። ቀደም እለ ለዐለ እግልነ አፍካር እኩይ ወፍገሪት ሐዋኒት እንዴ አስኔነ እብ ተአሰትህል እግል ንክደም ዲበ ወፍሬ ፋሪ ናይ ወቀይነ እግል ንብተክ ዲበ ናውያም ህሌነ።

ነወየ እብ አፍ እንዴ ኢትገቢእ እብ ፍዕል ገብአት ምን ገቢእ ቱ ለፍገሪት ትትረከብ ምን

አውኪራም። እለ የም ትነውወ ለህሌክም ነወየ ደዓም ክእኒ ክም የም ትነውወ ዐልክም። ምነ ደዓም ለበይአኩም ገለድ አው ክሉ አው ለበዝሐ ምኑ ዲብ ፍዕል እውዑላሙ ህሌክም ምን ገቢእ። እላመ ናይ የም ዓመት ነወያክም ረቢ እግል ልስዴክም እባቱ። ሰበት እለ ሰነት አጀደድነ እንዴ ኢገቢእ ለወቀይክም ዲብ ፍዕል እግል ትተርጃሙ ህለ እግልክም። ሐሬ ህይ ሰነት ምን ሐቲ አምዕል ወዎርት ሸሀር ትትአንበት። ምን እለ ሸሀር ሐቲ እንዴ አንበትክም ዐስር ክልአት ወሬሕ ብክም። እለ ክሉ ለእግል ቲደዉ ትነዉ ህሌክም አፍዓል ምን እለ ሸሀር ሐቲ እንዴ አንበትክም ዲብ ዐመል አውዐልኩሙ ምን ገቢእ ዲብ አክረቱ እግል ተአብጽሕዉ

ለከርዐክም አለቡ። ምናተ ደሐንቱ ዐሬ እቡ ዲብ ትብሎ እለ ሰነት አሸሁረ እንዴ ዐለበት ክባባይ ገብአት ምን ገቢእ ነወየ ዲብ አፍ ትትባተክ ህሌት በሀለት ቱ። ሰበት እለ ለእግሉ ትበይኦ ገለድ ፍሬሁ እግል ትርከቦ። ምን አዜክም እብ ፍዕል አንብቶ። እንትም ለደረሰ ህይ ሰነት 2017 ለትሳርሖ እቡ ወሰነት 2018 ለትትከቡቶ እቡ እምትሓን ሰር-ሰነት ክማም ጋቢእ ዲብክም ሀሌ። ከዲብ ሰነት 2017 ለዘርአኩሙ ዘርእ ነቲጀት ናጅሐት እግል ትርከቦ ምኑ መዳሊትክም ትረዶ። እንሻለ ሰነት ሐዳስ ለፈዳብያም ምነ ቀዳሚትክም ለሐሰት ነቲጀት ወለ ድሁራም ዲበ ትወቀለት ደረጀት ትትወቀሎ ዲበ ሊደየ እግልክም።

ሐናኒት

ምን መጀለት “ማእዘር” ለረክብናህ እብ ክሱሰ ሐናኒት ለትሀድግ መዐሉመት እግል ንቀድም እግልኩም።

ሐናኒት ዲብ ደምቀተ ምን 100 ወለዐል ዕንታት ህለ እግላ። ከባደት ሚዛነ ህይ። 001 ሚሊ ግራም ትገብእ። 48 አንያብ ወሰለሰ ልብ ህለ እግላ። እሎም ሰለሰ ልብ ለዎሮት ምግባይ ገብእ እትህለ። ለክልአት እብ እንክር ደነብረ ልትረከቦ። ክል ልብ ህይ ናየ መሐጠት ንድአት ወመትከባት ናይ ደም ህለ እግላ። እምበል እለመ ሐናኒት ለለአትሐዝየ

ደም እግል ትምጽጽ ለትትነፈዕ እቡ አብሳር ህለ እግላ። ለደም ህይ እብ ነዕዩቱ ወቅያሱ እንዴ ኢገብእ። እብ ሐፋነቱ ተሐርዩ። እምበል እለመ እለ ክልቀት ንኢሽ ለለአትሐዝየ ደም እግል ትንሰእ እግላ ነፈር እሰልፍ በንጅ ትጠልቅ ዲቡ። እንዴ ኢልትአመሩ ህይ ደሙ ትሰሕብ። ለደም ክምሰል ነስአት ሐቆ ክልኤ ሳንዩት ለንኩሽ ነፈር ምን ገርቡ እግል ልወርክየ ወሰወሰ ልብል። ሰበት እለ እለ ሕንኩቶተት ክልቀት ብዙሕ መትደጋግ ለልአትሐዝየ በዐል አከይድስ ተ።

አጥዐሚቶ

አምዕል ሐቲ ዎሮት ነፈር እት ዐዳገ ንዋይ እንዴ አተ እግል ልትዛቤ ከልል ዐለ። እንዴ ገኔሕ ህይ ዎሮት ነፈር መደፍ ገናድ ዳብጥ እት እንቱ ጸንሐዩ። እግለ መደፍ እንዴ ልትሐዋረር ህይ፡-

“እለ መደፍ ከምቱ?”
“2500 ቱ ንስኡ።”
“አላ---! መደፍ ስኒ ግራም ቱ። ለሽብሩ ወለአሰዑዱ ከአፎ ገዜፍ ቱ?”
“አቤ። ስኒ ርሹድ ቱ ንስኡ።”
“አክር ከም ትብሉ?”

“2000 እግል ሀቡኩ ንስኡ?”
“ያረይ እለ መደፍክ እበ ሕውዝ እብ ዎሮት እያድ በሽል! መደፍ ደሐን ኢኮን!”
“መልህይ አፎ ዲብ ሐምዴ ሌጠ በጠርክ ንስኡ?”
“ምነ ክልኤ አልፍ ከም ትከሬ ምንዩ?”
“1500 ሀይቡኩ ትትዛቤ ገብአክ ምን ገብእ!”
“ወላሂ እለ መደፍክ እብ አማን እግል ሰብዐይለት ገብእ! ለሲጋሁ እበ ተካመት። እበ ሕውዝ! ዛቱ

አብሸሎት ኢልሐዜ። ለበረይ ናየ ጢሾ መልእ!”
“አማንካ ቱ! እትለ ዐዳገ አክል እለ መደፍዬ ይህለ! እብ 1000 ነቅፈ እግል ሀቡኩ ንስኡ።”
“መደፍክ ስኒ ርሹድ ወመፈተይ ቱ። ምናተ። አነ አዜ ይእነስኡ!”
“አማንካ ቱ! እንተ እብ አየ እግል ትንስኡ። ለመደፍ እብ ብጣሩ እት ህለ ሲጋሁ። ክሙንዮቱ ወዓጭምታቱ ክሉ በልዐካሁ ማሚ!”

መራዐየት አንያብ አግሩዝ ወአጀኒት

አፍ ለልትመጭመጭ እቡ ፌሻይ

መመጭመጪ አፍ። አፋነ ስኒ እግል ልጼኔ ንትነፈዕ እቡ። ድድ አንፋሰ(ጀራሲም) ለቦም አፍ ለልትመጭመጭ እቦም ፌሽት ህለው፣ አልኮል(ክሐል) ሰበት ብዲቦም ላኪን አጀኒት እግል ልትነፍዖ እቦም ኢወጅብ። ሰበቡ ህይ አፍ ለልትመጭመጭ እቦም ፌሽት አጀኒት ሰበት ልውሐጦም መደረት እግል ለአጅሩ ዲቦም ቀድሮ። ከእብሉ። ምን ሰስ ሰነት ወተሐት ለዕምሮም አጀኒት እግል ልትነፍዖ እቦም ኢወጅብ። አፍ ጅነ ጸኔ እኩይ ሐቆ ወደ ላተ። አረር/ረክሰ ወሪድ አው አንያብ እግል ልግበእ ሰበት ቀድሮ ዲብ ሐኪም እንዴ ጌሰ ከሸፍ እግል ልውዴ ለአሰትህል።

መመጭመጪ አፍ ሐኪም ሐቆ ቀረራ ቱ ሌጠ ጅነ እግል ልትነፈዕ እቡ ለቀድር። አጀኒት አንያቦም እብ ነዳፈት እግል ልጽቦጡ ወምን ጀራሲም ሕር እግል ልግበእ ክል-ዶል እግል ልመዩጽ ወጅብ።

መትፋቀዲ

1. ግርዝ ሕጽቤ አፋሁ እግል ልልመድ እበ ትትቀደረነ አንያብ እግል ለአብቅል ዶል ለአነብት ፍርሽት እግል ለአንብት ወጅብ።
2. መዩጽት አፍ አንደፎት አፍ ክምሰል ለመድ አሰቦሕ ወሐቆ ድራር እግል ልግበእ ወጅብ።
3. ዋልዴን ጅናሆም እብ ዋጅብ ፍርሽት ወዴ ክምሰል ህሌ። እግል ሐኪም እግል ለአክዶ እግሉ ወአሰክ ሰስ ሰነት ወዴ ናሶም እግል ልታብዕዉ ለአሰትህል።
4. አንደፎት አፍ ምን ልውሕድ ምን ክልኤ አሰክ ሰለሰ ደቂቀት እግል ልግበእ ወጅብ። ለትነፍዐ እበ ፍርሽት ሰለሰ አው አርበዕ ወሬሕ ክምሰል ወዴት እግል ንቀይረ ወጅብ።
5. ግርዝ አክል ሐበት ዐይነ-ዐተር ምን መዕጁን እግል ልትነፈዕ ህለ እግሉ።
6. ጅነ ወድ ሐምስ ሰነት ክምሰል ገብኦ አፍ ለልኦነድፍ ኬዋ/ግድ እግል ልትነፈዕ ወጅብ።
7. ቀደም ውላድ ሰስ ሰነት አጀኒት መመጭመጪ አፍ እግል ልትነፍዖ አለቦም።
8. ጅነ እት ክል ሰስ ወሬሕ ከሸፍ እግል ልውዴ ወጅብ።

መፋርቅ ለደብእ ቀመማት (Sealants)

መፋርቅ ለደብእ ቀመማት አንያብ አጀኒት እግል ኢልአሸዕሽ እንዴ ትበህለ እበ መምልኢ አንያብ ለሸቅየ መአሰሳት ዲብ ዐዳገ ለልትረከብ ስኒ ኔፍዓይ ቀመም ቱ።

አሸዕሾት አንያብ እብ ፍንቱይ ዲብ አልሓይ-ቀደም ወአልሓይ-ሐር ናይ አጀኒት እብ ቀሊል እግል ልትጠወር ቀድሮ። ሐድ 80% አሸዐሾት አንያብ ነበረ ዲበ እንመጭር እቡ አንያብ ልትከለቅ። ሰበቡ ህይ ነብረ ለእንመጭር እቡ አልሓይ መፋርቅ ወመጣሚዕ ሰበት ለህሌ ዲቡ ወእግል ተአንድፋ ህይ ምሽክለት ሰበት ቱ። ባክቴርያ ልትከለቅ ዲቡ። እለ ባክቴርያ እለ ተራሪፍ ነብረ ወዐከር እንዴ ትነፍዐ አሲድ ሰበት ሸቂ ኢናመል ለልትበህል ለዓላይ መገልበብ ናይ አንያብ እንዴ በልዐ መጣርቅ ከልቅ።

እለ እግል ኢልትከለቅ መሰከብ ባክቴርያ ላቱ አካናት ቆሪ ወመፋርቅ ለመልእ ቀመም እንዴ ትነፍዐክ ባክቴርያ ክምሰል ኢሰክን ዲቡ እንዴ ወዴክ አሸዐሾት ክምሰል

ልትከረዕ ትወዴ።

መምልኢ እብ ሰብ መቅደረት ዲብ አንያብ ለለጥእ ነዲፍ አው ህይ ሽግራይ ፕላስቲክ ቱ። እለ ዲብ አልሓይ ቀደም ወአልሓይ ሐር ለለጥእ እት ገብእ። ተራሪፍ ነብረ ወዐከር(ዐከር) ክምሰል ኢልትአኩብ። አሲድ ህይ ክምሰል ኢልትሸቂ። አንያብ እብ አሲድ ክምሰል ኢልትደመዕ ወዴ። አንያብ እግል ኢልአሸዕሽ እግል ወቅት ረዩም ናይ ዳፍዖት መቅደረት ህሌት እግሉ። ሰበት እለ አሸዐሾት አንያብ እግል ዳፍዖት ለሐሰ ዴብኦይ ቀመም ቱ። አንያብ እንዴ ኢልአሸዕሽ እግል መፋርቅ ወቆሪ አካናት እብ ሲለንት ለልትበህል ቀመም ምልአት ኔፍዓት ቱ።

ሲለንት እብ ከአፎ ልትመለእ?

እለ ቀመም እለ እግል ትውደዩ መረ ቀሊል ገብእ እት ህለ። እግል ክሉም አጀኒት እግል ልግበእ ወጅብ። እለ ቀመም እለ ውድየት ለኢልአመጽጽ ወብዙሕ ሐኪክ አንያብ ለኢልሐዜ ወቀይ ቱ።


- ሐኪም አንያብ እግል ኒብ ሽሙይ ለአነድፊ። ሲለንት እግል

ልግበእ ዲበ ለአትዳልዩ።

- ሲለንት ዲብ አካናት ቆሪ አው መፋርቅ ልትመለእ።
- እለ መረ ሻፍግ ወለኢልአመጽጽ ገብእ እት ህለ። አንያብ እብ ዋጅብ ሐቆ ትመልኦ ለእንመጭር እቡ መቅጠን አልሓይ-ቀደም ወአልሓይ-ሐር እግል ኢልአሸዕሽ ምእት ምን ምእት ዳፊዕ።
- ሲለንት እንዴ ሐቆ እግል ልትከለስ ሰበት ቀድሮ። ዲብ ክል ከሸፍ እግል ልትከሕ አው ልትፈተሽ ለአሰትህል።
- ሲለንት እግል መደት ሰለሰ አው አርበዕ ሰነት እግል ልጽነሕ ቀድሮ። ሐቆ ሐቆ ህይ እግል ትበድሉ ትቀድር።

ሲለንት ሚ ዶል ገብእ?

ጅነ ባካት ወድ ሰስ ሰነት ገብእ እት ህለ በህለት። ለናይ ሰልፍ ለሐ-ዕብ ዶል ትበቅል ገብእ። ለበዝሐ አሸዐሾት አንያብ ዲበ ለእንመጭር እቡ ገጽ አንያብ ሰበት ጀሬ። ሲለንት አግደ ዲብ እለ ባካት እለ እግል ልግበእ ለአሰህል። ሲለንት እት ዶሉ አንያብ ክምሰል በቅለ ሐቆ ገብኦ አሸዐሾት አንያብ እግል ልትከረዕ ቀድሮ።



ኣሳር

መታሕፍ ወምጅተመፅ፡ ተጃርብ መትሐፍ አቅሊም ቅብለት በሐር ቀየሕ



አትፋዝያት ሸዐብ እት ቅጮ



ተበርግት አሳር ለመድ እብ ሸዐብ

መታሕፍ መካሰብ እግል ልጃቅፍ ለኢሰትት፡ ውርስ ሰዋልፍ ምጅተመፅት ወደዋርም እንዴ ጀምሮ ሕፍዝ ለወዴ ወለ ልአክብ ተ። ክምሰልሁመ እግል እሊ ውርስ ቀዳምያም ላቱ አሳር እግል ዓፌ እንዴ ቀደመ እግል ድርሳት፡ ብሐሳት ወመትረይሐት ምጅተመፅት አውለውየት እንዴ ሀበ ለከድም ተ። እግል ክድመት መጅተመፅቱ ለተአሰሰ መአሰሳት ምጅተመፅ ቱ መታሕፍ። እሊ ለእት ሰነት 1989 እት 16ይ ፅሙማይ ወወለ እድንያይት ቤት ጎማት(ምክር) መታሕፍ ለትሳደቀ እቱ፡ ሀደፉ ዐባይ መዐነት ለእት ለትፈናተ ክፋላት እለ እዲነ ለህለ መታሕፍ ለሸፊሕ ተ። እት ዐድነ ኤረትርየ ለህለ መታሕፍ ምጅተመፅ ኤረትርየ እግል ታየኖት ተጃርብ መትሐፍ አቅሊም ቅብለት በሐር ቀየሕ እትሊ ክቱብ እሊ ቃርብ ሀለ።

አቅሊም ቅብለት በሐር ቀየሕ፡ እግል ክሉ ምዕራፋት ታሪክ ወድ አዳም ለወክል አሰር ለመልክ፡ ናይ ዓዳት (ለመድ) ወጠቢዐት ብዝሐ ጅንሰ ለወክል ታጅር አቅሊም

ቲ። ክምሰልሁ ሰበት ገብእ እትሊ አቅሊም ለልትረከብ ታርፌታት መትሐፍ አቅሊም ቅብለት በሐር ቀየሕ እግል ልትፈተሕ አግደ ሒለት ለገብእቲ። መትሐፍ አቅሊም ቅብለት በሐር ቀየሕ እት ሰነት 2000 እት 10ይት ሰነት ዝክረት ዐመልየት ፈንልቅ፡ እግል ጠቢዐታይ ወቅዱም ናይ ዓዳት ታርፌታት አቅሊም ቅብለት በሐር ቀየሕ እንዴ አመመ ለበገእ ተ። አስክ እለ እተ ሐልፈየ 20 ሰነት ወራታት እሊ መትሐፍ አቅሊም እሊ፡ አግደ እት መሻረከት ምጅተመፅ ወሴድየቱ ለተንከባቲ፡ በርናምጅ ሕፍዝ ወአትፋዝያት ምጅተመፅ እቱ እንዴ ረከዘ ከድም ጸንሐ ወሀለ። እግል እሊ ፋይሕ በራምጅ እሊ እት ጌማም እንዴ አተ፡ ተጃርብ መትሐፍ አቅሊም ቅብለት በሐር ቀየሕ ምስል ሸዐብ ለበተ ፅላቀት እትሊ ክቱብ እሊ ሸርሕ ሀለ።

ፅላቀት መታሕፍ ወምጅተመፅት ጅሀድ ትሩድ ለልሐዜ ወፋይሕ አትፋዝያት ለትሐዜ ወራት ተ። ምጅተመፅት ምን መታሕፍ ለረክቡ መካሰብ

ዐቢ ገብእ እት ሀለ፡ መታሕፍ ህዬ ምስል ምጅተምፅት ምን ቅሩብ እብ ክድመት ብዝሐ ጅንሰ ለልሐብር ታርፌታት ምጅተምፅት እብ እርየት እት ዕፌ ቀደሞቲ፡ ለትመቅረሐት ፅላቀት መታሕፍ ወምጅተመፅ ፍጥረት፡ እት ፍንጌ ሰብ መቅደረት እሊ መጃል ወክል ክፈል ምጅተመፅ ናይ ንቃሽ አሳስ እንዴ ከረ ለልትጠወር እት ገብእ፡ መታሕፍ እሊ እት መፃል እግል አውዐሎት ለአመመ ሀድፍ እግል ለሀሌ እግሉ ቡ።

ለትፈናተ ሰሚናራት ወተአሂላት እንዴ ነዘመ፡ ሸዐብ እት መታሕፍ እንዴ መጸ ለልትሐዜ ክድመት እግል ልርኩብ ከዲም ወእት ለትፈናተ ድዋራት እንዴ ተሐረክ እት ለትፈናተ ታርፌታት ብሐሳት እግል ሊዴ ወክም ዐባይ ምህመቱ እንዴ ነስአየ እብ ትሉሉይ እግል ልትከደም እቱ ለቡ ጋር ተ። መትሐፍ አሳር አቅሊም ቅብለት በሐር ቀየሕ እተ ሐልፈየ ሰኖታት፡ ምስል አማን ለአቅሊም እንዴ ትጸበጠ ምን ቅብለታይ እንክር እሊ አቅሊም እንዴ አንበተ አስክ



ሕላይ ሰብ በዳር

ምን ሐልየት ዐድ ተክሌስ ላቱ መስመር ወድ ገዳይን፡ እሊቱ ክምሰልሁ ፈቂራይት ሰበት ገብአት አጊድ እግል ትቅነጽ እንዴ ቤለ ክእነ ሐለ እግል፡

ሐሰሲ ም ሐጃ ፋዝዕቱ ለፌደ ለመዐገጅ ወለከባሪ መምብ ወለወሬዘ እት እዲነ ለተገብእ ዲብ አልኣክረ ግጤ ተ እሳት ጸለም እንፈርህ ባሮት እብ ለልሚተ ጽልመት ቀብር እንፈርህ አክል አክል ለሕዴደ “መን ረበክ” እንፈርህ ሼጣን ለአግሁ ሸቲተ ሰራጥ ጸብጥ እንፈርህ ከልኡ ገብእ ለኬደ ላሊ ለኬረ ምን ቀርብ ለሸዋጤን ምን ጌሰ ኢወደየ ዲብ ህለ ኢረክበ ክም ጌሰ።

እንዶ ትጋሚነ ንዒ ም ሐጃ እንስከብ አፎ ለሞት ኢትፈቅዲ ምሴት ለእለ ንትወረብ አፎ ለሰራጥ ኢትፈቅዲ ለሸክነ በነ ትትገረብ አፎ ለእሳት ኢትፈቅዲ ለማዳለ አልጀህብ እሊ ምድር ንሕደን ሴመ እምበል ንትከለብ ሕጃት እንዶ ወረድነ ዲብለ ሰብአ ንትዐለብ ለኢወደወ እት ህለው ፈንገሕ እብ ሚ ትትረከብ።

እናስ ሐንሸብ ለልቡሉ ላሊ ልትአሰህ ዐለ ከመስመር ወድ ገዳይን እለ ሐሊ-

ሕነ አፎ ቦፌነ ወእሊ ሐንሸብ ኢስክብ እብ ፈርህት ሓራተ ቱ እብ ተከለብ ወእብ ሕሰብ ‘መን ረበክ’ እንፈርህ ግሱይ ረአሰለ ተረቅብ ጽኑዕቱ ፈርህት አለቡ ጋናቱ ጥላድ ኢዐልብ ካትብ ዲብናቱ ለትበሀለት ዐልብ ዲብነ ወጸብጽብ ምን ክልኣት አሰማጠ ምን ተሐት ትጸልምት ወትጽብብ እበን ወሐጸ ገብእ ዲብ ሐለብብ።

እት አግዳም በሐር ቀየሕ ለህለ ጀዛይር፡ ፋይሕ አትፋዝያት ምጅተመፅ ሞዲቱ። እሊ ለእት ክል ምዴርየት አቅሊም ቅብለት በሐር ቀየሕ ለገብእ አትፋዝያት ሸዐብ ፈሀም ምጅተመፅ እት አሳር እንዴ ወቀልክ መሻረከት ሸዐብ እት አከቦት ወዴቅቢት ታርፌታት እግል ዓበዮት ለገብእ ተ። እት ረአስ እሊ፡ እሊ ወራታት እሊ ናይ ለመድ ዝሕሮታት አሳር እሊ አቅሊም እግል አትአማር ዐቢ ዶር ለቀደመ እት ገብእ፡ ብዙሕ ምን ናይ ለመድ ዝሕሮታት አሳር እግል ጅምዐትመ ለሰደ ዐለ። ክም ረድ ፍዕል ናይ እሊ ወራታት እሊ ህዬ እት ክሉ ድዋራት አቅሊም ቅብለት በሐር ቀየሕ ሸዐብ ምስሉ እንዴ አከበዩ ለጽንሐ ብዙሕ ሰኖታት ለወደ ናይ ለመድ አሳር እብ ሸክል ህያብ እግል መትሐፍ አሳር አቅሊም ቅብለት በሐር

ቀየሕ እግል ልትባልሐ ቃድር ሀለ። ዕልም፡ ተጃርብ፡ መቅደረት ሸዐብ ወናይ ለመድ ዝሕሮታት አሳር እትሊ አቅሊም ለህለየ ቁምያት እት ክል ለገብእ ዕፌ ለትትሐዜ ሐብሬ እንዴ ረፍዐው እግል ልትረአው አሳስ ጋብእ እግሎም ሀለ።

ዶር መታሕፍ አሳር እት ምጅተምፅት ምስል ስያሰት፡ ዓዳት፡ እቅትሳድ ወእት ከልፍየት ምጅተመፅት እብ ቃትን ወእንሳንየት እንዴ ትጸበጠ ለገይስ ጋር ተ። እሊ ጋር እሊ ህዬ፡ እግል ስያሰት ወናይ ዓዳት አማን ምጅተምፅት ክምሰልሁመ ዝሕረት እቅትሳድም እበ ምሮት እንክር ወምህመት ናይ ዓዳት፡ ጠቢዐት ወታሪካይ ውርስ ምጅተመፅት እበ ካልእ እንክር ተርጀመት ራትዐት እንዴ ትህየበ እብ ፍዕል ልትአከድ።

ልተላሌ...





ሴፈ ደረሰ አሰክ ዐውቱ፡ ለኢልትወሐሴ ሴፈ

“ሴፈ” ለትብል ከሊመት ምስል ምጅተመዐን እብ ብዝሐ ለህሌት ሰሚተ። እግልሚ ለትፈናተ መዓኒ ሰበት በ ወእት ብዝሐት ወራት ሰበት ተኣደ’ሚዕ።

ምጅተመዐ ትግሬ ለበዝሐ ክፈሉ ሐረከት ለብእተ ሐያት ለሓልፍ ለዐለ ምጅተመዐ ወገሌ ክፈሉ አሰክ እለ እባሁ ለህለ ምጅተመዐ እብ ግብእቱ፡ እት ክል ሐረከቱ ምን ለአረይም ወለአቀርብ፡ ወራዱ ለልአጠልል ፈሻይ፡ ማይ አው ሐሊብ ወእት ከብዱ እንዴ ትክሬት እገሩ ለተአሰብት እግሉ ነበረ እንዴ ረፍዐ ልሄርር ወእበ ሐሊት እንዴ ረክበ ወቀዩ ለአገዴ ዐለ ወሆ’ለ።

እብሊ ህዩ፡ ለሴፋሁ እንዴ አትመመ አካን ለእግለ ኣምም ለዐለ በጽሕ ወለዓርፍ ነብረ። እበ ካልእ እንክርመ ሴፈ እንብል እት ህሌን እግል ሐቱ ሓጃት መሰባል፡ እስትሸሃድ፡ድፍዐት ለበ ተርጀመት ሰበት ተሀይብኩ፡ እብላመ ሐጠር ምጅተመዓት ወፍዘ እግል ሀይፍ ወብዕድ ወራታት ለትሐብር ትገብእ። እለ ተርጀመት እላመ ምን እለ ገቢል እለ ለኢትፈግር ተ። እግልሚ፡ እለ ገቢል እለ እት ወጠት ወብዕድ ዓዳቱ ወሰዋልፉ ሰበት ልትሰየፍ ወልሐልፍ።

ምናተ እለን ክልኤ መዐነት እለን መምክን እግል ወክድ ሕግድ እንዴ ጸንሐዩ፡ ሀይፈን ዶል ዘብጠ እግል ልህሰሰ ቀድረ። እለ ኣዜ እግል እክተብ እቡ እንቡት ለህሌት ሴፈ ላኪን ኣክ’ለ ምድር ጸብሐ ሴፋሁ እት በርክት ለልሄርር ተ። ሻብ ዑመር ዑስማን ደረሳይ ኩልየት ሕክምና ዕሙማይ ዓፍየት ወመጃል አንያብ ተ። ህቱ እግል ብዘሕ ሰናታት ደርሰ እቱ ለጸንሐ መጃሉ እንዴ አትመመ እግል ልደሐር ወናይ ዶክተራይት ርትቡቱ እግል ልንሰእ ወክድ ሐድ ታርፉ እተ ለህለ እቱ ወክድ፡ ምስለ ዕርፍ ለኢተሀይብ ድራሰቱ እንዴ ጨምረ ወድ ብክሩ ላቱ ክታብ “ሴፈ ደረሰ፡ አሰክ ዐውቱ”እንዴ አጥብዐ እት የም 28 ዲሰምበር ሰነት 2017 ሳዕት 6:30 ገጽ-ምሴ ለአንበተት መናሰበት መድሐራቱ እት መጥዐም ዐርበኝ እት እዴ ቁርአቱ አብጸሐዩ።

እተ መናሰበት ሸግን እብ ብዝሐ ሓድራም ዐለው ወለበርናምጅ እብ ለትፈናተ ጽበዋ ፈን ጋምል

አምሴ፡ አዳም ትለወቀ ወትረይሐ፡ እግልሚ፡ እት አክትብት ትግራይት ኣዜመ ምርት ሰበት ትወለድ፡ እምበልሃመ ናዩ ፍንቲት ለሐቅፈ ክታብ ሰበት ዐለ። ለክታብ እብ ኣድም ሳልሕ አቡሐረሽ ቱ ጌማም ለገብእ እግሉ። ለእተ ክታብ ለህለየ 12 ምዕራፋት ክል ምዕራፍ እግለ አሰረ ለህሌት ምዕራፍ ለትሰንድ ወለትበኔ ተ። ኣድም እለ ወቀይ እለ እግል ልሰርግል በህለት ለክታብ እግል ልጌምም ሸቅል ህዩቡ ሰበት ዐለ፡ እት የም 27 ዲሰምበር እንዴ ጸብጠዩ እተ ወብረት ኣቲ እቡ ሰበት ዐለ፡ ወእነ እት እዴሁ ክም ርኤኩወ እግል ክልኤ ሳዕት እንዴ ነሰአክወ ምኑ፡ ምነ ሐድ 100 ገጽ ለገብእ ጽበጡ ለዝያድ ሰሩ ክም በጽሐኩ፡ ምነ እተ ረኣሱ ክቱብ ለህለ ዕንዋኑ ወኪን ክም ነፌዕ እግል ኣምር ቀደርቱ። እግልሚ፡ ወለ እት ሸቅል ፍሩራም ለህለው ሸግን እት ኢዝዋት ወክድ ሸቅሎም ወአሳሰ ፈሸሎም ለልሐብር ወእግሉ እንዴ ባልሐክ እት ዐውቱ እግል ትብጸሕ ክም ልትቀደር ሰበት ፈሀምኑምኑ ተ። ክታብ ሴፈ ደረሰ አሰክ ዐውቱ እግል ክሉ እብ ዓመት ወእብ ፍንቱይ ህዩ እግለ እብ ሂገ እምም ምን መኣንብታይት አሰክ ደረጀት ኩልየት ለደርሰ ደረሰ ለኢልትከ’ለሰ ሴፈ እንዴ ገብእ እግሎም፡ አሰክ ዐውቱ እንዴ ኢገብእ፡ አሰክ ዐውቱታት ለመርሐም ክታብ ክምቱ እግል ኣምር ቃድር ህሌኩ። እብ ሂገ እም ለትከተቡ፡ ለመክር ወለነሴሕ ክታብ ሰበት ገብእ።


እለ ክታብ እለ፡ እቡ እግል ልፈክር ለአንበተ ኬትባዩ ሻብ ዑመር ዑስማን ምን ናዩ ተጃርብ እት ሄራር ተዐሊሙ ለሳደፈዩ መታክል እንዴ ትብገሰ፡ እተ ግራሁ ለህለው ደረሰ እግል ኢልትደ’ገም እንዴ በላቱ እለ ምስዓር እለ እግል ልንሰእ ለቀረረ።

ህቱ ቀደም ክልኤ ሰነት እንዴ ኤተዩ ጽበጡ ምን ተጃርቡ፡ ኢንተርኔት ወለትፈናተ አክትብት እት ለጥሙ ተ። እትለ እንዴ ሳርሐናህ ሳምን ሰነት ሐዳሰ ኣትያም ምነ ለህሌን ሰነት 2017 እግል ልድሐሩ ለቀድረ።

ለእብ ኬትባይ ለትዳለ ክቱብ፡ ሰልፍ ቀደም እት ጥብዐት በጹሕ፡ ጽበጡ ወመንፈዐቱ እግል ልታየን ሰበት ዐለ እግሉ፡ እብ እንክር ደረሰ

ደረሰ ቦርዲን ደቀምሐሬ ወኩልየት ዓፍየት አሰመረ ወእብ ሰብ መቅደረት ህዩ ምን ፈሬዕ መናህጅ ኤረትርዩ እስታዝ መሐመድ ሰዒድ ሓምድ፡ ምን ውብረት እዕላምመ ኣድም አቡሐረሽ ወብዕዳም እንዴ ረኣወ ወለልትሓይሰ እንዴ አሰነው እቱ ለትብገሰ ክታብ ተ።

እሎም ክም ታየነዉ እት እዴ ብዝሓም ዳርሳም እንዴ በጽሐ ረኣዮም ለረክበ ክታብ ሴፈ ደረሰ አሰክ ዐውቱ፡ እግል ጥብዐት ክም ትዳለ ለዐቤት ምሽክለት ኬትባይ ለዐለት ምሽክለት ሰላዲ ጥብዐት እግል ትትባለሕ ሰበት ዐለ እግሉ፡ እት ብዝሓም ሰብ ርዝቅ ምጅተመዐን ሄረረ ኬትባይ፡ ምናተ እብ ለትፈናተ አሰባብ ኣምዕሎም ሰበት ኢጸዕዴት፡ እግል ልሰደዉ ሰበት ኢቀድረው፡ እብሊታት እዴሁ እግል ፈሸል እንዴ ኢመ’ጤ፡ ኣዜመ እት መሕበር ሸግባት ወደረሰ ኤረትርዩ፡ ባንኪ ዐማር ወዐቦት ኤረትርዩ በጽሐ፡ ኣዜመ



ኢትዐወተ።

ለባብ ዶል ልደበእ ምንክ መምክን ለሸግክ እግል ለህሌ ቀድር። ለባብ ክል-ዶል ሐቀ ደረካሁ እግል ልትፈተሕ ቅሩብ ህሌ፡ ምን ደረቡቱ ኢቲቂብ ለልብል ታምም ሕሰባት እት ምኑ ሰበት ዐለየ ኣዜመ ጀርቤ ጀረቤ፡ እብ ገበይ አሰይድ ቢንያም ሃይሌ መስኡል ብንየት ትሕትየት አቅሊም ግብለት ለምሽክለት ለባልሐ እግሉ ዐሚድ ኩልየት ሰማፕ ፕሮፌሰር ተሰፋይ ህይሌ ምስሉ አትዋጅህዩ። ፕሮፌሰር እግል ሻብ ዑመር እንዴ ተሐረበ ወቀረዱ ፈሀመ፡ እግለ ክታብ ለጠቤዕ እበ ሰላዲ ሰለፈዩ። እብሊ ህዩ፡ እት እት አብያት መጥበዐት እተ ወደዩ በሐሰ፡ ለሐሰት ወእግሉ ለትናስብ መጥብዐት አትለሰ እት እንተ ሰበት ረክበዩ፡ ክታብ ዲበ አጥበዐ ሻብ ዕመር።

ገሌ ምነ ሻብ ዑመር ሐቀ ትብገሰ ኬርዓይ ክም አለቡ ለአክደ ጅህድ ተ። እለ መታክል እለ ለትዐደ ሻብ ዑመር ኣዜመ ለእግደ ሰቅ እንዴ ገብእ እግል ክል ኬትባይ ጸብጥ ለህለ ሰቅ ወዝያት እግል ልትዐዴ ናዩ አብሳር እግል ለተ’ሌ ክምቱ ቱ ለልሐብር። ህቱ

እት ሂጋሁ፡ “አክትብት ፈግር እት ህሌ፡ እብ ገበይለ እት መዳይን ሌጠ ለህለየ መክተባት ልትነሸር ዐለ ወህለ። እለን መክተባት እለን ህዩ እምበለ መጽአን ነፈር፡ ብዕድ እቱ ኢነድአ። ሕነ ህዩ፡ ለእብ ትግረይት ለእንክትብ አንፋር ለእግሉ እንክትብ ህሌን ምጅተመዐ እትሊ መክተባት እለ ለኢመጽእ ሰበት ገብአ፡ እብ ገበዩ እት እትሐረክ ወእብ ክል ንዩት ለቡ ነፈር እግል እንሸሩ ሓሪ ህሌኩ። እለ ህዩ፡ ለእበ መክተባት ለትትብተክ ሰላዲ እበ ምርት እንክር ወእበካልእ እንክር ህዩ፡ አክትብትን እት ሀደፉ እተ ሐጭረ ወክድ እግል ልብጸሕ ለሰድዩ ቱ” ቢለ።

“ዕልም እብ ገበይ ቅራኣት ክም መጽእ ወለ ቀርእ ህዩ ምስል ዘበን ወንዩት እት ኬትባይ እግል ልትብደል ለቀርድ ቱ” ለቤለ ሻብ ዑመር፡ ክል ሻብ ዘበን ቅራኣቱ እንዴ ነዘመ ዶል ቀርእ፡ ምን ክል ክታብ ብዘሕ እግል ልድረሰ ክም



ሓበረዩ ዶል ለሀይቡ፡ እብለ እግለ ልትህዩብ ለህለ ጅነ እግል መሰተቅበሉ ልብጸሕ ለሰድዩ ሴፈ ነሀይቡ ህሌን በህለት ተ። ወእብላመ እግለ ልትሻብብ ለህለ ክቱብ ትግራይት እንሰንድ ሰበት ህሌኑ ፈጅር ምን መትሻባብ እት ፍሬ ብዘሕ እግል ልትዐዴቱ።

ሻብ ዑመር ዑስማን፡ እግል ክል ነፈር እለ ክታብ እለ ምኑ እግል ልሃቤ ለሐዘ ውብዕድ ነሲሓት ወምክር እግል ለሀቡ ለሰትት፡ እብሊ ለተሌ ዕልብ ተለፉት እግል ልርከቡ ሳምሕ እግሉም ህሌ። ሻብ ዑመር ዑስማን ዕልብ ተለፉን 07425193 እግል ለአተሰሎ እቱ ክም ቀድር እንዴ ሐበሬኑ፡ እት ደንገበ እለ ደረጀት እለ እግል ልብጸሕ ለሰድዉ ፕሮፌሰር ተሰፋይ ህይሌ ዐሚድ ኩልየት ሰማፕ፡ አሰይድ ገብሩ ህይሌ መስኡል ፈርዕ ብንየት ትሕትየት አቅሊም ግብለት፡ አሰይድ እድሪስ መሐመድ ሌክሸረር እት ኩልየት ዓፍየት አሰመረ፡ አሰይድ እድሪስ መሐመድ ሀንርዋይ ሚልካይ መጥዐም ዐርበኝ፡ ሰሕፊ ኣድም ሳልሕ አቡሐረሽ፡ ደረሳይ ኩልየት ደተረት አሰመረ መሐመድ እድሪስ ሓምድ (ኮምፕዩተር)፡ ዶክተር መሐመድ ሓምድ፡ ደረሳይ ኩልየት ዕሙማይ ዓፍየት ወአንያብ ነቢ ሙሴ፡ ዶክተር አሰመርም ውብዕዳም እትለ ደረጀት እለ እግል ልብጸሕ ለሰደዉ እት ለሐምድ ሳርሐ ምንእነ።

ሕናመ ክለን ለከሰሰን አጅሀዘት ሕኩመት ውብሕተ፡ መንፈዐትለ ክታብ ወጽበጡ እንዴ ረኣየ እት መንፈዐት እግል ለአውዕላሁ ወምጅተመዐ ዝሕረቱ ክምቱ እንዴ አግረሰ እቡ፡ አምዐጥክ እግል ሊቤሉ ንትፋኔ።



እብ መክበር ወጠን ሸግኩ ወደረሰ ኤልትወሐሴ ሰባቲቲ

ክብርነህ

ልባብ

ሻም እት እዲነ ለበልሰዩ ወለት

ሐቲ ሰኔ ግርም ላተ ሺክቶሪን ለትትበህል ወለት ዐለት። ለወለት ምን ዐይለት ሰኔ ታጅረት ወጽግብት ውልድት ሰበት ዐለት። እት ዎሮት ሰኔ ዐቢ ወምን ቅያሰ ወለዐል ግሩም ላቱ ሮሻን ወእተ ወቅት ለሀይ ክል-ዶል ሐፍላት ለጉበእ እቱ ወለበዝሐው ሕሹማም ወእሙራም ላቶም ውላድ ፈረንሰ መጽ እቱ ለዐለው አካናት ትቅር እቱ ትነብር ዐለት። ከዲብ ሐቲ ምን እለን ሐፍላት እለን። ሺክቶሪን ምስል ዎሮት ጆልያን ለልትበህል ሻብ ክም ካትብ ሸቄ ለዐለ ተአመረት። ለሻብ ሰኔ ግሩም ወዓቅል ወበዐል ወቀይ ነብረ። ለሻብ ሰኔ ፍቱይ ነብረ። ህቱ ወለ ሓግል ምን ለዐሌመ። ምስል እለ ጽግብት ወለት እብ ሻም ትጸበጠ። ከእሊ ሻማት እሊ እግል ሊሪሙ ወለአምሸሽ ምኑ ምን ሐዛመ። ክሉ ረአሱ ቀዲር አበ። ከእት ደንገበ እግል ልህደዩ ቀረረ ከምን ትሰአለዩ። ህታዲ አቤት እሉ ወእግል ዎሮት ብዕድ ምን-ዐድ እተ ክምስልህ ጽጉባም ላቱ ፊኒል ለልትበህል ሻብ ሐፊት።

ወቅት ሐልፈ ወሺክቶሪን እግል ፊኒል ተሀዲት። ምናተ ሐቆ ህዳዩም ብዞሕ ህተ ለኢትፊትዩ ወሰኒ መአበይ ላቱ ጠባይዕ ክም ዐለ እሉ ፈሀመት። ፊኒል ረሕመት ለአለቡ። ክቡር። አናኒ ወምን ቅያሰ ወለዐል ምኑሕ ዐለ። ሺክቶሪን ምስል እሊ መንደላይ እሊ እግል ትንበር ኢቀድረት ወእብ ሰኔ ክቡድ ላቱ ሕማም ትጸበጠት። እት ደንገበ ህይ። እብሊ ሕማመ ሰበት ሞተት። ክመ ህተ ለሐድገተ ወሰዩት እት ሐቲ እትለ ባክለ ትወለደት እቱ ድጌ ለትትረከብ ሰኔ ዓድዩት ላተ መቅበረት ትደፈኑት። ጆልያን ከበርለ ሞተ ክም ሰምዐ። ገሌ ሰንዐት ክለ ሐያቱ እብሊ በዐለ ሻማቱ ለተአትፋቅዱ ሰበት ትሸነህ። እተ ዶሉ አሰክለ ቀብረ ጌሰ። ምድር ሰር ላሊ ክም ጉብአ ጆልያን ለቀብረ እት ለሐናፍል አንበተ። ሰንዱቅለ ግናዘተ እንዴ አፍገረ ከፊትሐዩ ወእብ አናቤዕ ጀለም እት ለአብል እት ለዐፍዩ አንበተ። ለገጸ ግሩም እበ አጫቤዕለ እዲሁ እት ተማትም ወእት ለአትቃምተ። አመተ አለቡ

ርሙሽለ ፈታይቱ እት ረምሽ ረአዩ። ወእተ ዶለ ለዕንታተ በል አበሉ። ጆልያን እብ ድንጋጽ እተ አካኑ ማይ ብሩድ ገበአ። ምናተ ርሐ እንዴ ትማለከ። ምስለ ሰንዱቅለ ግናዘተ ምንለ ሕፍረት አፍገረዩ። ወቤቱ እንዴ ጌሰ እበ እሰዓፋት ወደ እለ።

አምዕል ሓሪት ምድር እንዴ ኢጸቤሕ ለሰንዱቅ እንዴ ጦረ እትለ መቅበረት በልሰዩ። ወለጋር ዎሮትመ እግል ኢለአምሩ ተማም ሰትረዩ። ሺክቶሪን እብላህ እግል ገሌ ምዴላት እት ቤት ጆልያን ክም ጸንሐት ዓፍዩተ ምን ሐዲስ አቅበለተ። ወሐዬት..ወክልኢቶም እንዴ አተፈቀው አምሪክ እግል ልሳፍሮ ወዲቡ መንበሮ ሐዳስ እግል ለአሰተብዱ ትፋህመው። ሐቆ ዕሰረ ሰኖታት እብ ሐጫር እጃዘት አሰክ ፓሪስ አቅበለው። ከዲብ ሐቲ ሐፍለት ማሲያም እት እንቶም ሺክቶሪን አመተ ለይዐለት እለ። ለናይ በዲር ብእሰ ፊኒል እት ፍንጌ ገሌ ጅማዐት ግሱይ እት እንቱ። ወተማም እት ልትፋጠነ ርኡቱ። ሐር ፊኒል። “እንቲ። ሐቲ ሰኔ ለአምረ እሊት እግል ትመሰሊ እጅ ህሊኪ” ቤለዩ። ለህግያሁ ሰኔ አደንገጽተ። ወህተ ዲብ እለ ድንጋጸ እት እንቱ። ፊኒል ተማም እት ልትፋጠነ አንበተ። ወእብላህ እብ ዕንቱ እት ክሉ ለገሮበ እት ለአንገዎ። እት ደንገበ ለዕንቱ እት እትለ ድገለባይት እዲህ ለዐለት ሕላገት ትከፊት። እለ ኢነት-እለ ክም አመረዩ ሰበት ተአከደት። ለደመ ዲብሊ አሰራረ ልትሐረክ ክም የሀለ ምስለ እተ። ፊኒል ህይ። እብ ክርን ውቅል። “ሺክቶሪን. እንቲ ሺክቶሪን እንቲ” ቤለዩ። ለወለት እለ አማን እለ ለትክር እበ ሐሊት ሰበት ሰአነት። ለጋር ክሉ ዳገመቱ እለ። ፊኒል ህይ ተማም ለአተንሰዩ እንዴ ዐሉ። ሐር ወረገት ሕድግህ ሀበዩ። ወሐቆ እሊ ዕሰረ ሰኖታት ለነሰአ ሻም ምስል ጆልያን ተሀዲት።

መዕሉመት

- እት ወቅት አሰባሕ ምን ፊሸት ብዞሕ ዶል ትትናወል። ሰኔ ልወቅ ወዕጹም እት እንተ ትውዕል።

ልባብ፡ ምክር ወህግዩ ጥዕም

- ሰሓቅ ለትሓወሌክ ትትረሰው..ምናተ ብካይ ለትሓወሌክ ላቱ ክሉ-ረእሱ ምን ልብክ ኢበዴ!

- ልወቅ እት እንተ እግል ትንበር ሐዘክ ምን ጉብእ። እግል ክሎም ጋራት ኢተሐልሎም። እግል ክሎም ጋራት ኢትፈሰሮም። እግል ክሎም ጋራት ብዞሕ ኢትባሕሶም... እግል አልማዝ ለባሕሰውመ “ፈሐም እት እንቱ ጸንሐዮም”።

- እንተ እት በኬ እተ ትወለድክ እቱ ወክድ። ክሉ ለአዳም ልትሰሐቅ ክም ዐለ ኢትትረሰዕ.. ከለአዳም ክሉ እት ልትባኬ እንተ እት ትትሰሐቅ እግል ቲሙት ሐዘክ

ምን ጉብእ። ዐመል ሳሌሕ ዕመል።

- ክሎም እብ ሕበር እግል ተአርዴ ነፍሰክ ኢትጅበር። እበ እንተ “ራትዐት ተ ወእት ገበዩ ህሌት” ለትብለ ሌጠ ርዴ። ወምስል ሸንሀትክ ለኢዋፍቅ ሐቆ ጉብእ ህይ። እንተ አዘ ወቅትክ ምን ሐዲስ እት ምክር ወአደቦት “አጀኒት ነኣይሸ” እግል ተአብድዩ ለትጅብረክ ሐቱመ አለቡ።

- እት ሸቅል ለተሓልፉ ወቅት ምን ሰለሰ ብቆት ለአድሕነከ። ምን መሻገት። ወረዛለት ወሕግላን።

- ቀዋዕድ ዐውቲ እሎም ቶም እግል ይኢበል አክል ሕድ ለአምሮም ኢመሰለኒ። ምናተ

ለአግደ ቃዕደት ፈሸል ላተ ክሉ አዳም እግል ተአርዴ ዶል ተሐሰብ ቲ።

- መሰኒ ክ'መ እተ ሰልም ቲ። አው ተሐት ልትከሬ እብከ። አውመ ለዐል ፈግር እብከ። ከአዩ ሰልም ክም ለሐይሰከ። አክል-ሕድ እንዴ ፈጠንክ ዕረጉ።

- ወብኬ በል ወትሰሐቅ እዲናዲ እግል ተአተላሌ ቲ..ከርሕክ መንፈዐት ለአለቡ እቱ ህመም ኢትሐ'ምሉ።

- ምስጢርለ አናቤዕክ እግል ዎሮት ኢተአትአምሩ። ወኢጉብአት ምን ጉብእ። እብ እሰወ ገበይ ክም ለአበኬክ እግል ለአምር ቲ።

እብ አማን ቱ!

- ዓሳ። ሰክራን ዓሰ ጼኦዩ ምን ጉብእ። ዐቅሉ ለዐቀብል ወዘዋለ ልቡመ ለአባሬ ምኑ።

- ገመል። ገመል መራነት አለቡ..ለብዕድ ሐዋናት ላተ ክሉ መራነት ቡ። ከምን ዐጃይብ እንሰ። ህተ መራነት ሰበት አለባ ቱ ለእብ ሰብረ ወለብዞሕ ከሃላተ ለትትአ'መር።

- ዕጩት ተናን። አኖመን ለትትበህል ዕጩት ህሌት። እለ ዕጩት እለ እት ጃፓን ለትትረከብ ለተአትፈክር ዕጩት ተ። ህተ ዶል ለጸሓይ ትወድቅተ። ምነ ከብደ ተናናት ተአፍግር።

- ገሌ ምን ምሀዞታት ዕልም። እብ ገበይ ዕልም ለትአከደ ጋር። ሐቲ ሰኔ ንኢሸት ላተ ወእብ ዕን እብ ሃለ እግል ትትርኡ ለኢትቀድር ሐሸረት። ሓያተ እብ ግዲደ እት ዒጻት ጫጮተት ህንብኦ እንዴ ጉብአት ክም ትነበር ተአመረ።

- ትፋሕ። ትፋሕ ምን ካፈዩን ወለዐል። እግለ ነሰኡ ነፈር። ላሊ እብ ግዲደ ፋዜዕ እት እንቱ እግል ተአጽኔሕ ለትቀድር ጠቢዐት ቡ።

ዝበድ ዛዖታት

- ለወቅት እግል ትብጸሐ ለብእትክ ጋራት ኢኮን። ህተ እግል ትተለዩ ለብእትክ ገበይ ተ..ከልወቅ እግል ትግበእ ወእዲነ ቀላል እግል ትግበእ እግል ተሐዘ ጉብአክ ምን ጉብእ። እብ ክሎም ለጋራት እግል ትትመተዕ ጀራርብ.. ወለ እባመ ትኬለመ ምናም።

ተበሰም

ዎሮት ሰኔ ሰፍህ ላቱ ነፈር እግል እሙ። “ይመ ዮም ላሊ አነ ተሐለምኮ ኢኮን” ቤለዩ። ህተ ህይ። “ከሚ ተሐለምከ?” ቲለቲ። “እንቲ መዐር ሉብክት እት እንቲ ወአነ ዐቀይ-ነዊድ ልቡክ እት አነ ተሐለምኮ” ቤለዩ። ህተ ህይ። “እሊ ለዘነብክ እት እንቲ ረቢ ገልበኬንቱ” ቲለቲ። ህቱ ህይ። “እተ ሕልም ለርኤክዎ እሊ ሌጠ ይዐለ” ደግመዩ ሻፍግ እት እንቱ። “ከብዕድ ሚ ርኤክ?” ትሰአለቲ። “እንቲ እት ትልሕሲኒ ወአናመ እት እልሕሲኪ ርኤኮ” ቤለዩ። ህተ ህይ። እት ትትሰሐቅ። “አደቦእ ለዕነት ትሰበቅ እትከ። መልዑን” ቲለቲ።

በህል

- እምበል ተፍኪር ለትትከበቱ ተዕሊም አብደዮት ወቅት ቲ። ምናተ እምበል ተዕሊም ለትወድዩ ተፍኪር ህይ ብቆት ዐባይ ቲ።

- ክሎም ዕዉታም ላቶም ጋራት ፍገሪት መትዳላይ ዕዉት ቶም። ከመዳላይ ሰኔ የሀለ ምን ጉብእ። ምን ኢትትዐወትመ ለለአትፈክር ጋር ኢኮን።

- እናስ ሕሹም ለለአኖክዮም ጋራት ክሎም ምስሉ እት ነፍሱ ህለው። ምናተ እናስ ሐምቅ ለለአኖክዮም ጋራት ምስል ብዕዳም ልትረከቡ።

- ምን ክብር እንዴ ደሐነ ለኢልትሃጌ ነፈር። ለህግያሁ እግል ትትሰመዕ እሉ እት ባሰር ብዞሕ መታክል ሳድፋ።

በህል እሙራም

- ለተጀረ ነፈር እግል እግበእ እሊ ብዞሕ ለለሀመኒ ጋር ኢኮን። እግልዬ ለለሀመኒ ጋር ህለ ምን ጉብእ። እብ ሰላመት ምትክራርዬ እተ እበጼሕ እቱ ወቅት። አነ ወቀይ ትሩድ ክም አውቄት ዶል ልትሰምዐኒ ሌጣ ቲ። “ሰቲፍ ገቤዝ”

- አደሚ አክልሕድ ዓልም እግል ልግበእ ጉብኦ ምን ጉብእ። እት ሰልፍ አክልሕድ ወድ አደሚ እግል ልግበእ ብዲቡ። “ኖፋልሰ”

- ክመ እበናይ። ለሰብ-ተመህ ክርኑ እግል ልስምዖ እንዴ ቤለው እት ዒለ ለኩፋ ኢትግበእ። “ሚካኤል ነዲመ”

ጣዓም

ዲብ አውሰትራልዩ ዎሮት ሰራቅ ሐቲ ሸባቤክ ፍቶሕ ለዐል መኪነት ረአ። ዲብሊ መኪነት ህይ ወህበት ዐባይ ጸንሐቲ። ዲብሊ ዐረብዩት ለዐለ ዐፍሽ ሞባይል ወመሕፈዘት ምን ሰላዲ ምልእት ዐለ። እሊ ማል እንዴ ዘምተ ክም ጌሰ። እግለ ሞባይል ዶል ፈትሐዩ። ሰወር ናይለ እት ረአሰ አጀኒት ነኣይሸ ለጉብኦ አከይ መዋዲት ጸንሐዩ። ወእሊ ጋር እሊ ምን ቅያሰ ወለዐል ሰበት አትቀጸበዩ። እሊ በዐል አከይ መዋዲት እሊ እት ቃኑን እግል ልትቀደም ብዲቡ ለልብል ቀራር ሰበት ነሰኡ። እግለ ርሐ እግል ፖሊስ እንዴ ሰለመዩ። ህቱ ለሞባይል ክም ሰርቀዩ አትአመረ። ወእሊ ለወደ እቡ ሰብብ። እሊ በዐለ ጀሪመት እግል ለአተጽብዋ ወእት ቃኑን እግል ልቀድሙ ምን ሐዛቲ። ፖሊስ ምን እሊ እንዴ ትበገሰው እግለ ወድ 46 ሰነት ላቱ በዐል ሞባይል እንዴ ጸብጠዉ ለልአትሐዘ ተሕቂቃት ክም ወደው እሉ። እት ሰጅን ክም ልትለከፍ ወደዉ።



መዕሉማት ዓም ስኬድ

ዲብ ዮም 22 ዲሰምበር 2017 ምን ፎርቶ አስመረ ምስል ሐረሰቶት መዕሉማት ዓም እግል ልግበእ እተ አሰክለ ለትቀረረት መዲነት ስነይ ትወክልኒ። ለናይ በገሰ ሳዕት 1:00 አደሐ ሰበት ዐለ 360 ኪሎሜተር እንዲ ጣዩምነ ስነይ እግል ንብጸሕ መጽብ ጅግረ ምስል ወቅት ዐለ። እብ ፈድለ ዑሬት አውቶቡስ ሐራት ወበዐል ተጅርበት ላቱ ሰዋገ ታረቁ ላኪን ሳዕት 7:30 ማሲ ምድር አፊት መዲነት ስነይ ገንገለኒ። ምኑ ህዩ ወካይል እዕላም ምዴርየት ስነይ እንዲ ትከበተው ዲብ መርሐነ ዲብለ ዱሉይ እግልነ ለዐለ ፋንድቅ አፍሪቀ አልጃዲደ ጠበሽ እምቤ።

ፈጅራተ ክሊነ አንፋር እዕላም



እበ መናሰበት እንዲ ትነፈዐነ እግል ጀሪደት። ፊድዮ ወትልፍዝዮን ለገብእ እግልነ በራምጅ እግል ንእሬ ዲብለትፈናተ ወራታት ትፈረርኒ። አምዕል እብ ግዲደ ህዩ ምስል ወቅት ዲብ ንትባደር እግል እት ከርስ ሐቲ አምዕል እግል ነዐሬ እብ ለእንቀድር ዳይ ዲብ እንታይን እብ ክቱብ ክምስልሁመ እብ ክርን ወስወር ዲብ ነኡሬ ምስል ዐለ እግልነ በክት ሐቲ አምዕል ቤትነ ለነኡቲ እብ በራምጅ ኢሐገልኒ።

አክል ሕድ ሳዕት 6:30 ለዓጻት በራምጅነ ለዐለ ዲብለ ልሰዕ ረስሚ ለኢደሐረ ላኪን እብ ገበይ ግርም ለትበነ መብነ ሐዲስ መሕበር ወጠን አዋልድ አንሳት ኤረትርዮ ፈሬዕ ምዴርየት ስነይ ዱሉይ ለዐለ በርናምጅ መዕሉማት ዓም እግል ንሰጅል ዳሌ።

ለበርናምጅ አግደ እብ ፊድዮ ክርን ገቢል ፈሬዕ ትግራይት ለትዝመ። እብ እዳረት ምዴርየት ስነይ ለትመወለ ወሐረሰቶት



ለአሻረክ በርናምጅ ምንመ ዐለ። ቅስም ጀሪደት ወትልፍዝዮንመ እግል ሰጅሎቱ ዱሉይም ሰበት ዐልኒ። ዲብለ እብ ለትለፈናተ ፈርያት ሐርስ ወናይ ሓድረት ሓሰት ወጠን ለከሰስ ሽዓራት ስርጊት ለዐለት ቃዕት አካናትነ ጸበዋ።

እሊ በርናምጅ እሊ ቀደም 23 ሰነት። ዲብ ሰነት 1995 እብ ቅስም ፊድዮ በርናምጅ ትግራይት ለአንበተ ወምነ ወክድ ለህይ እንዲ አሰተብደ ህዩ። ዲብ ለትፈናተ አካናት ምስል ለትፈናተ መአሰሳት። መሓብር ወጃሽ። ምስል ሐረሰቶት ወደረሰ። ምስል ሽቃለ ወለትፈናተ ወጠንያይ

መተንሰየት ወመተቅብለት። ክምስልሁመ ቁርኣት ትግራይት እብ መስኢት ዛይድ ለልታከወ በርናምጅ እት ገብእ። እግል ዝያድ 20 ሰነት ምስሉ ለሄረረው መዳልዮቱ ወመቀድመቱ ለሓኩ።

ዮም 23 ዲሰምበር 2017። ዲብ ቃዕት መሕበር ወጠን አዋልድ አንሳት ስነይ ክልኤ ሳዕት ለነሰአ እብ ፍርቀት ዓዳት ሽባን ምዴርየት ስነይ ጃላል ለወሰክ በርናምጅ ጅግረ መዕሉማት ዓም ህዩ ክምስለ ክሉ ለለአምሩ መዐደይ ምን ሰነት 2017 እት ሰነት 2018 ዐለ። ሰነት በኪተት ሊደዩ እግልኒ።



መሓብር ዲብ አስመራ። ከረን። ነቅፊ። ግንደዕ። ባጽዕ። ዐሰብ። አቅርደት። ባርንቶ። አስማዋ። መለብሱ። ተሰነይ። ደቀምሐሬ ወመንደፈረ ለገብእ ቅቡልየት ወክብቱ ለቡ እት ክል ግርበት ሰነት ወፈርወንተር ሰነት ሐዳስ ለገብእ በርናምጅ ተ።

እሊ በርናምጅ እሊ ክምስል ዎሮ ምን ሰነት እት ሰነት ለለዐዴ

ለበርናምጅ አክል ሕድ ሳዕት 6፡30 አመቅረብ እብ ዝክረት ሹህደ ክምስል ትከሰተ። ዱቅሪ ከሊመት ሙዲር ምዴርየት ስነይ አሰይድ ተሰፋኣለም ባህታ ተሌት። አሰይድ ተሰፈኣለም። “አሰናይ ደሓን መጽኢኩም” ሐቆለ ቤሉ። ዲብለ ቀደመየ መሓደረት ሐጫር ኦተ። ምዴርየት ስነይ ሐቲ ምነ ወራታት ሐርስ ወትጃረት ለገብእ እተን ምዴርየት ጋሽብርክ እት ገብእ። እብ ሐርስ ወርዕዮ ክምስልሁመ ትጃረት ለልትናበር ሐድ 98 አልፍ ሽዑብ ህዩ ክምስል ነብር እተ። ክለን ቆምያትነ ለትከምክም እም ክሉ ክምተ ወደሐ።

እንዲ አትለ ምስል አንፋር ውዛረት እዕላም ምን አስመረ አሰክ ስነይ ለጌሰ ሙዲር ዓም ቅስም ፊድዮ አሰይድ ግርማይ በርሄመ እብ ጀህቲ። ክርን ገቢል እብ ትሉሉይ ምስል መተንሰየት እት ክል ሰነት ለትዝመ ወትወድዩ በራምጅ ገቢል ልግበእ

ወአህምየት ናይለ ክእነ ላቱ እት ክል ሰነት ለገብእ ወራታት ክምስልሁመ ሄራር ዐቦተ መሻረከት መተንሰየተ ሰበት ገብኣት። እብ ፈድል መተንሰየተ ክእነ ውብዕድ በራምጅ እንዲ አዳሌት። ገጽቀደም ትትህርብብ ክምስል ህሌት ዲበ መናሰበት ሸርሐ።

ግረ እለ እግል ዓም ጽበዋ ወሀደፍ ናይለ እት ክል ሰነት እብ ክርን ገቢል በርናምጅ ትግራይት እንዲ ትዝመ ምን ሰነት 1995 ለአምበተ እብ ትሉሉይ እግል ሐድ 23 ሰነት። እት ክል ግርበት ሰነት ገዲመት ወሄለል ሰነት ሐዳስ ለገብእ በርናምጅ መዕሉማት ዓም እብ መስኢል ፈሬዕ

ሱሕፊ ስሌማን ዐቤ ልትቀደም እቶም ለዐለ ሰኣላት መዕሉማት ዓም እብ መትጃግረት እግል ልትብለስ አምበተ። እብ መትጃግረት ለኢትብለስ ህዩ እትለ ቃዕት ጅምዕ ለዐለ አዳምመ ለአሻርክ ሰበት ዐለ ለበርናምጅ ጋምል ዐለ።

ለሐረሰቶት 6 መትጃግረት ምዴርየት ስነይ ህዩ። ዲብ ክልኤ ቶከት እንዲ ትከፈለው ለበርናምጅ እብ ሕላይ ወአሸዓር ዲብ ልትፈናጌ እብ ነያረት አተላለ። ለሰኣላት ህዩ። እት ሐርሱ ዓዳት። መዕሉማት ታሪክ። መዕሉማት ዓም ውበዕድ ለከሰስ እግል ክል መትጃግራይ 8 ሰኣል ትቀደመ እቲ።




ሀደፍ ናይለ በርናምጅ ውዛረት እዕላም። እብ ኩሉ ሀገሊት ዲብ ለትፈናተ አካናት ለገብእ ክምስልሁመ ገቢል ለለአሻርክ ምን ገብኢ። ውዛረት እዕላም ማል እንዲ አፍገረት እብ አንፋረ ወአላተ ለትትፈረር እቲ በርናምጅ ተ። እሊ ዲብ ተሰነይ እት ዮም 23 ዲሰምበር ለገብእ በርናምጅ ህዩ አተላላዩቲ።

ዲብ ደንጎበ ለበርናምጅ ሐቆ ክልኤ ሳዕት ተምም እት ህለ። ለምን ሰልፋይ አሰክ ሳልሳይ ለፈግረው መትጃግረት ለዳለ እሉም ወእት ወራት ሐርስ ለነፈያም እብ ምዴርየት ስነይ ለዳለ ጀዋእዝ ምን ሙዲር ምዴርየት ስነይ። ሙዲር ዓም ቅስም ፊድዮ ወመስኢለት ፈሬዕ መሕበር ወጠን አዋልድ አንሳት ምዴርየት ስነይ ትከበተው።

እብሊ ህዩ ለበርናምጅ ክምስለ አምበተዩ እብ ጃላል ወገማል ተመ። አንፋር ውዛረት እዕላም ህዩ ፈጅራተ ምን ስነይ አሰክ አስመራሆም ተህርበበው።

ሰነት ኬር ወበርከት ሰነት ፈረሕ ወለውቀት። ሰነት ጽጋብ ወስነብ ሊደዩ እግልነ ሰነት 2018። አሚን...!!





አትሌት የማኔ ሀ/ሰላሴ ሰነት 2017 ካቲመ ሰነት ወዳ እለ



ምስል ተሟም አክር አውካድ ሰነት 2017 አትሌት የማኔ ሀይሌሰላሴ እት እድንያይ ጅግረ አትሌቲክስ አውላይ ፈግረ።

አትሌት የማኔ ሀይሌ ሰላሴ ለእግል 59 ዶሎ ገብእ ለዐለ ጅግረ ለእብ ቱር አፍ ዜ ሲቲ ፋንቻል(Tour of the City Funchal) ለልትአመር እት ገብእ፡ እት መዲነት ማዲራ አሳሰለ እመር መተልሀያይ ኩረት ፈሪቅ ርያል ማድሪድ ወሕሩይ መተልሀያይ እዲና ላቱ ክሪስትያኖ ሮናልዶ

ለገብአት መዲነት ለትሐደረቱ ጅግረ አትሌቲክስ እቱ ቱ እለ ዐውቱ እለ እግል ልትሰርጌ ለቀድረ።

እለ እት 30 ዲሰምበር ለገብአ ጅግረ አትሌቲክስ 5.85 ኪሎ ምትር ለገልበበ ጅግረ እት ገብእ፡ አትሌት የማኔ እግል ጅግረ እብ 16 ደቂቀት ወ29 ካልኢት አትመመዩ። እትሊ ጅግረ እለ 2ይት ወ 3ይት ደረጃት ለአብጠው አትሌታት እብ ቀደም ትሌ ወድ ሰባንዩ አትሌት አንቶንዮ ፅባዲ ወኾአን ሞሪኖ ዐለው።

መተልሀየት ፈሪቅ ደንደን ተእሂል ካሚረት ትሀየበው

ፈርዕ አትፋዝየት ወሐብሬ ወዛረት ድፈዕ መቅደረት አንፋሩ እግል ወቀሎት እት አንፋር ቅወት ድፈዕ ኤረትርየ ወድዩ ለህለ ተአሂላት እንዴ አተላለ እግል 32 መተልሀየት ኩረት እግር ወአትሌቲክስ ፈሪቅ ደንደን ክምሰልሁመ እግል ሕካም ወመደርቢን አንፋር ቅዋት ድፈዕ ኤረትርየ ለትሀየበ ናይ ናሽፍ ወለ ልትሐረክ ሰወር ሀቡ።

እለ ለእት 29 ዲሰምበር ሰነት 2017 ካቲመ ለገብአት እግሉ ተአሂል ካፕቴን ለምለም ፍሰሃዬ እተ ሀቡ ተውዴሕ፡ ርያድዩን አንፍር ቅወት ድፈዕ ኤረትርየ እት መስተቅበል ዝያደት ተአሂል እንዴ ተሀየበው እት ሐያቶም

ለህለ መታክል እግል ልጋብሆ ለሰዴ እግል ልግበእ ሰአዩቱ ሰነት ሸርሐ።

ሀቱ እንዴ አትለ በርናምጅታ ተአሂል እት ሰታት ሰነት 2018 እት ጌማም እንዴ አተ ልትሸቄ እግሉ ለህለ ጋር ክምቱ እንዴ ሐበረ፡ ለተሀየበ ተአሂል እብ ርያድዩን ከብቱ ሰነት ክም ረክበ እት ለአፍህም፡ ለተአሂል ናይ መአንበት ሰበት ገብእ እብ ሸቅል ወካድም እግል ልግብወ ወልጠወሩ ትፋኑ።

ወኪለ ትደሐርው እብ እንክሩ እምበል መትሐላል ለከድመው ሀይበት ለተአሂል እት ለሐምድ፡ ክእን ለመሰል ተአሂል እግል ልተላሌ ትሐሰቡ።



ዘመንፈስ ሰለሙን ሽምፕዮን አቅሊም ምግብ ሰነት 2017 ገብእ

እት የም 31 ዲሰምበር ሰነት 2017 እት ድዋራት ሲነመት ሮመ ለገብእ ጅግረ መትመሚ ሻምፕዮን ዐጀላት አቅሊም ምግብ ሰነት 2017 መትባድራይ ፈሪቅ ኤሪቴል ዘመንፈስ ሰለሙን እብ ኪሉል ንቃዋ ሻምፕዮን 1ይ ዲቫዝዮን ዐጀላት አቅሊም ምግብ ገብእ።

ለ140 ኪሎ ምትር ለገልበበ ናይ ደንጎበ ጅግረ ዐጀላት አቅሊም ምግብ እቱ ፈሪቅ ኤሪቴል እብ 101 ንቅጠት ወፈሪቅ አሰቤት ህዩ 88 ንቅጠት እንዴ ጸብጠው ቶም እተ ጅግረ ለመጸው። ፈሪቅ አሰቤት ለእብ ፈሪቅ ኤሪቴል ጽቡዋ ለዐለ መትወቃል ንቃዋ ሰበት ኢትረይሐ እቡ ለሓለት እት ናዩ መንፈዐት እግል ልበድለ እት ጅግረ ሚርሐት እንዴ ጸብጠ እግል ልፍገር ጅሁዱ ለአከደ እቱ ጅግረ እግል ልግበእ ከድም ዐለ። ምናተ መተልሀየት ፈሪቅ ኤሪቴል ለእግለ ጸብጠም ዐለው ሚርሐት እብ እግል ልሄሮ ወእት ካቲመ እግል ልብጸሐ ንዩት ሰበት ዐለት እግሉም ምን ፈሪቅ አሰቤት መትባድራይ ዐጀላት ሄኖክ

አውላይ ዲቪዝዮን እንዴ ገብእ፡ ካስ ወ8000 ነቅፈ ተሀየቡ። ወድ ፈሪቅ ሚካኤል ሃብቶም 2ይ ሰበት ፈግረ መዳልየት ፍደት ወ6000 ነቅፈ ትከበተ። እት ናይ ከደን ጅግራታት ሐየት ስጋደት ለገብእ ነፈር ፈሪቅ አሰቤት ሄኖክ ሙሉእብርሃን ህዩ እብ ዕሙማይ ንቃዋ ሳልሳይ ሰበት ፈግረ 4000 ነቅፈ ወመዳልየት ንሐስ ልትሀየብ እት ህለ፡ ህቱ እምበል እግል ሐየት ስጋደት ለትሀየቡ፡ ፍሌንዩት ሕሽመት 2000 ነቅፈ ከሰቡ። ሃኒባል ተሰፋይ ህዩ 1000 ነቅፈ ጀቅፈ።

እብ ደረጃት ፍሪቅ ፈሪቅ ኤሪቴል ሻምፕዮን ዐጀላት አውላይ ዲቪዝዮን አቅሊም ምግብ ሰነት 2017 ሰበት ገብእ ካስ ወ5 አልፍ ነፈ ነሰአ።

እት ጅግረ ዐጀላት አውልድ አንሳት ህዩ፡ መትጃግረት ፈሪቅ

ኪዳኔ ሻምፕዮን ሰነት 2017 እንዴ ገብአት ፍሌንዩት ወ6 አልፍ ነቅፈ ጃእዘት ተሀየቡ፡ግራሁ ለተርፈ ደረጃት እቱ 2ይ ሞላና ደበሳይ ምን ፈሪቅ ዐራግ 4 አልፍ ነቅፈ ወመዳልየት ፍደት ነሰአ እት ህለት፡ ሳልሰይት ወሓዘት ኪዳኔ ምን ፈሪቅ ጋላንፍሐ 3 አልፍ ነቅፈ ወመዳልየት ንሐስ ትሀየቡ።



እብ ኪሉል ንቃዋ ስጋደት ሞላና ደበሳይ ናይ ሕሽመት ፍሌንዩት ወ2 አልፍ ነቅፈ ትትሀየብ እት ህለት፡ ብሰራት ገብሬ መስቀል ምን ፈሪቅ ደንደን እግል ተ'ሌት ወጃእዘት ነሰአት። እት ጅግረ 2ይ ዲቪዝዮን ያቀብ ደበሳይ ምን ፈሪቅ ኤሪቴል ሻምፕዮን ሰበት ገብእ 6 አልፍ ነፈቅ ፡ፍሌንዩት ወመዳልየት ደሀብ ከሰቡ። ቶማስ ጎይትአም ምን ፈሪቅ አሰቤት ናትናኤል ተሰፋጽዮን ምን ፈሪቅ ኤሪቴል ህዩ እብ ቀደም ት'ሌ 2ይ ወ3ይ ደረጃት ጸብጠው።

እት ጅግረ ሐየት ስጋደት ፍሌንዩት ወ2 አልፍ ነቅፈ ለትሀየበ መትባድራይ ዐጀላት ፈሪቅ አሰቤት ምን ላቱ ቴድሮስ ተሰፋልደት ዐለ።



መሉብርሃን ዐጀለቱ እተ አኬት ምኑ ኢነት ለእብ መተልሀየት ፈሪቅ ኤሪቴል ለትርእ ህጃማት ተአምርተ ናይ እለ ቱ። እብሊ ህዩ ሃኒባል ተወልዴ ሸሪዋ ዐውቱ (ወለት ሳታ) እንዴ ኬደ ናይለ አምዕል ለሀ ጅግረ እብ ዐውቱ ለአተምሙ እት ህለ፡ ዘመንፈስ ሰለሙን ምን ኤሪቴል እብ ዕሙማይ ንቃዋ ሽምፕዮን አቅሊም ምግብ

ዐራግ ምን ጽባብሐን ሻምፕዮን ለጅግረ ክም ገብአዩ አምረት እት እንተን ቱ እተ ጅግረ አትያት ለዐለዩ።

እብሊ ህዩ እብ ደረጃት ፈሪቅ ካስ ዐባይ ወ5 አልፍ ነቅፈ ልትሀየበ እት ህለዩ፡ ፈሪቅ ጋላንፍሐ 2ይ ደረጃት እንዴ ጸብጠ አሰር ፈሪቅ ዐራግ ተልላ።

መትጃግረት ዐራግ ደሴት

እት ሳልሳይ ዲቫዝዮን ፈሪቅ ዋርሳይ ሻምፕዮን ገብእ እት ህለ፡ ፈሪቅ በሪኽ ህዩ ተለዩ። እትሊ ጅግረ እለ መትባድራይ ዐጀላት አማንኤል ረዘኔ ምን ፈሪቅ ዋርሳይ ሻምፕዮን እለ ዲቫዝዮን እለ ገብእ።

ደህይ ፕሪመርሊግ እንግሊዝ

እትሊ ለሐልፈ አውካድ ጅግረ ፕሪመርሊግ እንግሊዝ ምን እት ሰነት እት ብዕድ አምዕታት ገብእ አስመነ ወሀሌ፡ እለ ጅግረ እለ ማቶ አፍ ዜ ቦክሲን በሀለት ጅግረ መላከማት እቡ ለአመራቱ፡ እግልሚ መትጃግረ እምበል ዕርፍ እት ጅግራታት ሰበት ልትጸመዶ ቱ።

ሕና ላኪን መርበይ ፕሪመርሊግ ለቀየረ ጅግራታት ሰነት እንዴ ጸብጠና ማጸምኩም ህሌ። እትሊ ጅግራታት እለ ህዩ እት ሚርሐት ለህለ ፈሪቅ ማን ሲቱ እግል 18 ዶል እንዴ ኢልትቀለብ ለሄረረዩ ሄራር እብ ክሪስታልፓላስ መብጠሪ ክም ገብእ እግሉ ወፈሪቅ ማን ዩናይትድ መቅደረቱ እንዴ ሐወነት ምን ሄራር አሰር ፈሪቅ ማን ሲቱ እንዴ ትደንገረ እት 3ይት ደረጃት ለትመልሐወ እቱ ጅግራታት ቱ። እለ ለእት ሰነት ለቀርበ ጅግረ ፕሪመርሊግ እንግሊዝ

ቱ።

እብ አሳስ እለ ህዩ ፈሪቅ ማንዩናይትድ ምስል ፈሪቅ ሳውዝምፕቶን እት ወደዩ ትልህዩ 0 እብ 0 ሰበት ተዓደለ እብ 44 ንጠት እት 3ይት ደረጃት ከረ፡ ፈሪቅ ኤቨርቶን እብ ፈሪቅ ቦርንማውዝ 2 እብ 1 እንዴ ትጀገረ ፈሪቅ ቦርንማውዝ እብ 13 ንቅጠት ምን ከዋ ወዲቅ ፋግር ህለ።


ፈሪቅ ብሩኔይ ምስል ፈሪቅ ሂዲልርሰፊልድ እንዴ ተሀ፡ እብ ናይ ሕበር ዐውቱ 0 እብ 0 ተመት፡ ፈሪቅ ሰምንሲ እግል ፈሪቅ ዋትፎርድ 2 እብ 1 ልትዐውት እት ህለ እት ፍንጌ ፈሪቅ ሊቨርፑል ወሌሰተር ሲቱ ለገብአት ትልህዩ ኣብ ወድ ምስር ላቱ መሐመድ ሰላሕ ለአተ 2 ጎል እቡ 2 እብ 1 እንዴ ተዐውተ እብ 41 ንጠትእት 4ይት ደረጃት

ልትረኩብ ህለ፡ መሐመድ ሰላሕ እብሊ አግዋላት እለ እተ ሳልፋያም ሃዳሬን ፕሪመርሊግ ኩረት እግር እንግሊዝ እግል ልግበእ ቃድር ህለ።

ፈሪቅ ቼልሲ እግል ፈሪቅ ሱዩክ ሲቱ 5 እብ 0 እንዴ ቀልበ እብ 45 ንቅጠት ምን 3ይት እት 2ይት ደረጃት ወቁል ህለ።

ፈሪቅ ማን ሲቱ ምስል ፈሪቅ ክሪስታል ፓላስ 0 እብ 0 ሰበት ፈግረ ለእግል 18 መርሐለትል ጅግረ እብ ዐውቱ ለአትመመዩ ሄራር አርበዕ ንቅጠት ገብአት እግሉ ህለት።

ማን ሲቱ እብ 59 ንቅጠት ህዩ አሰክ አትኒን እት ሚርሐትል ጅግረ ለዐለ እት ገብእ፡ ፈሪቅ አርሰናል ምስል ፈሪቅ ዌስትፕሮሚቶ 1 እብ 1 ሰበት አትመመዩ እብ 38 ንቅጠት እት 5ይት ደረጃት ህለ፡ እለ እት ሰነት ለዐለት ፍገሪት እት ገብእ፡ ግራሁ ለገብእ ጅግራታት እተ ተ'ሌ ሞብዐትነ እግል ንጭመሙ እግልኩም ቱ።



ምነ ለኢትፈትሐ መሳእል



ለእት 1927 ለትወለደት ወለት ሩሰዩ ላተ ኒ ኮላጂክ ክም ክሎም ሩሰዩን ወራር ናዚ እግል ትጋብህ፡ ምስል አቡሀ ወሐወ ወለት 14 ሰነት እት እንተ እት እብ “ዳሽ ቀይሕ” ልትአመር ለዐለ ዳሽ ሩሰዩ ናደለት። እት እግል 900 አምዕል ለአተላለ ሐርብ ፕትረስፐርግ አው“ሌኒንግራድ” ሐቆ ሻረከት፡ እት ረአሰ ሰበት ትዘበጠት ምን ዳሽ ትሳርሐት።

ኒና፡ ዶል ተሐርቅ እት ድዋረ ብዝሓም ለለአትፈክሮ ሐጃት ጀሩ ክም ዐለው ልብ እግል ትክሬ አንበተት።

መደት ሐቲ ዲብ ብእሰ ሰበት ሐርቀት፡ እት ከሺነት አቲት፡ እትሊ ወቅት እሊቱ ህዩ እት ብዘሕ ሽቃላት ልብ ለከፊት። ምነ ሳይድ ከባቢ ሻሂ ኖሱ እት ወድቅ ወልሳበር ውኑር ቤቶም ኖሱ እት ልትወለዕ ወቀሰን ርኤት። እት ክምሰልሁም እት አጅያብ ብእሰ ለሀለ ሓጃት እግል ትክሸፍ ክም ቀድር አመርዳት። ኒነ ሐኪመት ምንመ ይዐለት፡ እብ ዕንታት እግል ሕሙም እንዴ ርኤት

ሕማሙ ናይ ፈረንሳ ቅድረትመ ዐለት እግል።

እት 1964 ኒነ፡ መሸክለት ዐቅል ሰበት ወዳት እት ሕክምነ ተኣቲ። እቲ ህዩ፡ ክም መትፋግዲ እግል ልግበእ እግለ እንዴ ቤለው፡ ለትፈናተ ሰፊ። ክም ሰፊ ወደው፡ አምዕል ሐቲ ለሐኪም፡ ኒነ እንዴ ኢትርኤ ምነ መጦረ ለዐለ፡ ሰንዱቅ፡ ለሐፊቱ ግድ ተሀርሰ ክም ዐለት ተኣከደው። እት ክምሰልሁም እት ዕያደት እግለ ክምሰልህ ለመሰሎ ወብዕዳም ሕሙማም አንፋር እት ተዐድድ እቲ ወቅት ህዩ፡ ሻፍግ ተቅዩር እግል ለአርኡ ወጸል፡ም እግል ልሕዩ ለአነብት ክም ዐለ ልብ ከረው።

ለለአትዐጅብቲ ኒነ፡ እብ ግንሐት ዕንታተ ሌጠ ከባቢ፡ መዓልግ ወብዕድ ሓጃት ምነ ምክራዩ እግል ተሀርሰ ወሳዕት ብነ እግል ተሐርክ ወተኣብዋር ቀድር ዐለት። እት ሰር 60ታት ሸሃረት ኒነ እት አሮባ እብ ተማመ እግል ልትፈንጠር አንበተ። እት እት ሞሰኮ ለገብአ ሰልፋይ ወዕሉ፡ፓራሳይቲሎጂ፡ እግል ቅድረተ ለከሰስ ተቅሪር ክም ቀርቤ፡ መትመራምረት አሮቢ እብ ክሰሱ እግል ልትአዩሶ አንበተው። እት 1970፡ መትመራምረት አምሪክ ዲብ ኒነ ለለአትሐዜ ተፍቲሽ እንዴ ወደው እት ጀረበው፡ ህተ ክመ አዩደ ለለአትዐጅብ መዋዲት ወዳት። በሀለት ለዳለ እግለ ሓጃት እንዴ ኢተምትሙ ምነ አካኑ ክም ተሀርሱ ወዳት፡ እግል ሐቲ ለትሰበረት ቤጩት እብ ዕንታተ እንዴ አዘዘተ፡ እግለ አሰፈር ክፋለ ምነ ጸዕደ እንዴ

ፈንቲቲ፡ እት ናይ ሰስ ምትር ረዩም ለዐለ ሸሓን ክም ለአቲ ወዳቲ።

ለውላድ አምሪክ ላቶም መትመራምረት፡ እብ መዋዲት ኒነ ምንመ ተዐጀበው፡ ቃሸሽም እግል ኢተዐሌ ሸክ ሰበት ዐለ እግሎም፡ እት አሜርካ ዲብ ፍንቲት አካን እንዴ ትላከው ጀረበው። እቲመ ምንለዐል ቅድረቶም ላቲ ወደዲት አርኤቶም። ገሌ ምነ ዐጃይቦታት ለኒነ ወዳቲ፡ እግል ሐቲ ቅርዕ ሆንደንት ልብ እብ ሕክመት ክም ትሸፍግ ወደንግር ወዳቲ። እግለ ምነ ክሎም መትመራምረት አምነ ለይዐለ ዶ/ር አልበርት ሃርትመ፡ እግል ሆንደንት ልብ እንዴ አሸፈገተ ሞት እንዴ ሸአገ ክም ለአቀብል ወዳቲ። ሐቆ እሊቱ ህዩ ለመኤምረት እግል ፍንቲት ቅድረት ኒነ ኮላጂክ፡ “እብ ዕልም ለኢወድሐ ዐጃይብ” ቤለው።

ኒነ፡ እት ወሳእል እዕላም ብዘሕ በራምጅ አቅረበት። እግል መሰል፡ ምነ እደይ ዔፍየተ ደም ክም ልትቃጠር ውድየት፡ ምነ ምግሳዮም ክም ቀንጾ ወድየት ወአፍካሮም እንዴ ከሸፈት ሐብሬ ተሀይብ ዐለት።

እት1990፡ ኒነ ሰድፈት ሞተት። ሐኪይመ ህዩ፡ ለአያም ለእግል ልትመራመሮ ዲብ ትወድዩ ለዐለት ወደዲት እግል ቲዴ ትትዕቦ ለዐለት ተዐብ፡ አሳስ ሰብብ ሞተ እግል ልግበእ ክም ቀድር ሸርሐው። ህተ ዶል አዩ ፍንቲት ሓጀት ትወዴ ሰኒ ትትዕብ ክም ዐለት፡ ሕብረ ልሰወድ፡ ትልህብ ወቅያሰ ደመ ወሆንደንት ልብ ምነ ዐደድ ወለዐል ወሰክ ክም ዐለ ለአፍህም።

ምን ዳያሪ

ዶል-ዶል እግል አዳም ነቢር. . .


ዮም 1/1/ 2018 ሳዕት 1:01 ናይ ላሊ አትኒን አሰመረ

ዕለት ፡ሳዕት፡ አምዕል ወሰነት እብ ክትብቺ ትትፈከሪ ክም ህሌኪ ምን ደማቀትለ ሸዋርኪ ልትፈህመኒ ህለ ዳያሪዬ። ክም ይአምን እብ ምን ለዐልኪ ኣነ አምር። ላኪን ምስልኪ ወቄርአትኪ እግል እትፋህም ላዝም ሰበትቲ እትነፈሶ እብ ህሌኮ። ዶል-ዶል አዳም እግል ብዕዳም መ እግል ልንበር ቡ መሰለኒ። እት ልብሎ እስምዕ ክም ዐልኮ ሸክ አለብዬ። ለሰምዐክወ ላኪን እግል ኢደዩ ላዝምቲ ገብእ? ኣነ ብዘሕ ሰአላት እግል እትሰአል እንዲኢኮን፡ እት በሊሰ ክም ይእሰዔ ተአምራ። ከአዜመ ምን ሰዐይ በሊሰ እለ ሰአል እትሕጩር ህሌኮ። ላኪን እብ ሰዐይ ለኢገብእ እብ መትመናሽ ገሌ በሊሰ እግል ሀብ ዔብ ኢመሰለኒ። ክሉ ለሰምዐክህ እግል ቲዴ ላዝም ኢኮን፡ ምናተ ዶል ዲቡ ትትከረዕ እንዴ ነፊክ እግል ትሕሪ ምኑ ምሸክለት አለቡ። ከአናመ ልእክቺ እግል ሓልፍ ሰበትቲ ለሀደፍዩ ዶል-ዶል እግል አዳም እግል እንበር እግል እጀርብ ሰበት ብዬ ክም ሳዕት፡ ዕለት ፡አምዕል ወሰነት እግል እትነፈሶ እብኩ። ከዳያሪዬ እብ እንቲ ውብዝሓም አዳም ትብሉ ሰነት 2018 ሐቲ ዳቂቀት ወ38 ሳንዩት ናስአም ምነ ህሌነ አው ናስአት ምንእነ ህሌት። አላሁ አክበር! አዜመ ሰአል ተሓበሬኒ ጸርነ? ላኪን ደሐንቲ ሐያት ኩለ ሰአላት እምበልተ፡ እት በሊሱ ሌጠ ረቢ ልሰዳ። እት ለዐል ምን ሰነት 2018 ሐቲ ደቂቀት ወ 38 ሳንዩት ናሳም ምነ ህሌነ አው ናስአት ምንእነ ህሌት ብህል ዐልኩ። ከእብ አማን ሕናቲ ለናስአም ምነ ህሌነ ወለ ህተ? ኣነ ክም ረአዬ ሀታተ ለትነሰእ ምንእነ ህሌት እብል። እግልሚ፡ ለደቃይቅ እሊ ምነ ለኢገብእ ምን ዕምርነ ገይሰ ሰበት ህሌ። ደጀምዐ፡ ኣነ ዮም እት አፍካርዬ ብዘሕ ተቅዩር እርኤ ህሌኮ። በዲር ሂበት በሊሰ እፈቲ ይዐልኩ፡ ዮም ላኪን ለትመሰለኒ እፈፊ ህሌኮ። ለሰብብ ሚቲ ገብእ? ማዕሌሽ ለሰብብ አምሩ ይህሊኩ። እብ ገብእት ዮም ምስል ፈተቺ ወመሳኒቺ እት ብዘሕ አርእሰ ሃድጋም ዐልኩ። ህቶም እት ሰነት ጀዲደት ሚ እግል ቲዴ፡ ሚ ተቅዩር እግል ተአምጽኦ ቲ እት ልብሎ ሕድ ልትሰአሎ ማሰደም ዐለው። ኣነ ላኪን በደል ለሰአላቶም እበልስ እት ሰአላቶም እትፈከር ዐልኩ። ደጀመዐ! ጀመዐ ሰነት ጀዲደት ወገዲመት ሚቲ?እብ አማን ህዩ ክምሰልሁ ህለ? ደቂቀት 60 ካልኢት ክምተ ሚ ተኣከደት ብነ? ሳዕት 60 ደቂቀት ክምተ ህዩ? ሸሀርሰነት . . . እሊ ክሉ አዳም እግል መፋህመት እግል ልትወጤ እግሉ ለአምጽዩ ህልወሳቲ እንዲኢኮን፡ አምዕል ዲመ አምዕል ተ ወላሊ ላሊ። እለን ክልኤ ሓጀት ክም ሀለዩ አምን፡ እግልሚ እብ ዕንታቺ እርእዮን ሰበት ህሌኮ።

ብዕድ ላኪን ከንዶእ? ምነ ክሉ ለለአትፈክረኒ ህዩ ዳያሪዬ 12 ሸሀር (እብ ህቶም ልቡሉ) ክልጦ ክም ህለው እት ለአምር በደል እት ዶሉ ሰይሑ እት ሰነት ጀዲደት(እብ ህቶምልቡሉ ህልዋሳት) ለይቀዱሩ ወዐድ ለአቲ። ወድ-አዳም እግል ሐልፈት እግል ልጌምም ወእግል መስተቅበል እግል ልኤትን እኩይ ኢኮን። ምናተ ምዶል ለትብል ሰአል በሊሰ እግል ልትረከብ ቡ። ሰነት ጀዲደት ክምሰለ ሐልፈዩ እግሳተ። ጸሓይ ክም በዲረ ትፈግር ወትወድቅ፡ ምድር ጸ'ቤሕ ወመሴ። አዩ አምዕል ላኪን ጀዲደት ወለኢተአቀብል ሰበት ቲ፡ እብ እግል ንሕሰብ ብነ። ከበዐል ሰብር ዳያሪዬ፡ ናይ ተቅዩር ወቅት እለ ኢነት ሰበት ቲ፡ ኣነ ወእንቲ ወቄርአትኪ አዜ ንትቀዩር። ተቅዩር ላኪን ሚቲ ለትብል በሊሰ ለተሐዜ ሰአል ዓባይ ህሌኮ። ተቅዩር እት ሰን መእት እክ? አዩ ነፊር ተቅዩር እት ልብል እንዲኢኮን፡ እት ሰን መእት እክ እት ልብል ሳምዕ ይኣነ። ወቅት ህዩ አክል አዩ ነሰእ? እት ሐቲ ደቂቀት ለመጽኦ ተቅዩር ህዩ ፍገሪቲ አክል አዩ ትገብእ ? እብ አዳም ወደዩ ለመጽኦ ወምስልክ ለኢገይሰ ተቅዩር ህዩ ከፎቲ? ለሰአል ለዐባይ እግል ትትበለስ ገብአት ምንገብእ፡ አወል እለን ሰአላት ነኣይሸ እግል ልትበለስ በን። ለበሊሰ ላኪን ኣነ እግል አክልሱ ይእቀድር አው ናዩ በሊሰ እግል ክሉ ለወክል እግል ልግበእ ኢቀድር። እግልሚ ኣነ፡ ኣነ ሰበት ኣነ። ዶል-ዶል እግል አዳም እንበር፡ ላኪን እብ ዐውል ነቢርነ እግል ልግበእ አለቡ። ማዕሌሽ ዳያሪዬ ረአሰኪ አዳርት ዲብኪ! ዶል-ዶል ክእነ ክም እወዳዲ ቃውየት ሚእንቲ ከሀሊኒ፡ አሰናይ እትለ አብጽሐክ ሐዳስ ወገዲመት እብ ኢከሰስ!

Moደ

10 ፍንቲት ሰወር ርኩብ



አዳወሮት ሸዕር

እሊ ሸዕር
ለአፍካር ካትር
እግል ገሌ ከምክም ወእግልገሌ ፈንዋር
ወኪል ሸዕር ምን ቁሪነ ፈግር
እግል ሻክፍ ገበይ ለሐብር
ወእግል ራቴዕ ቀደም ለአብል።

ሸዕር ለብኩይ እብ ሰለስ ሐርፍ
እግል ገሌ ኢከልእ ወእግል ገሌ ኢለሐፍፍ
እግል ክሉ እብ ሐቲ ዕን ለሀይቡ ናዩ ወሰፍ
በዐሉ ዕቅደት ለቡ ሸዕሩ ነግፍ
እሊ ለኢከልስ ርዝቅ በዐሉ ዲመ ጀቅፍ።

ላኪን ከለልመ ቡ ሰብኡ ለለአሙሩ
ሰብኡ ምስጢር አለዐም እት ከብድ ለለዐቁሩ
ወሰብኡ ዕዩብ ኢልብሎ እት መሕበር ለሰቲሩ
ሸዕር ቁባይማቲ እት ክል ነፊር ኢከርኬሕ
እግ'ላመ ከርከሐዩ እንዴ ፈረገ ፈቲሕ
እት ገደዳት ኢሰልም ወእት ምድር ኢጀጌሕ
ሐቲ ዶል ሐቆ ትገስ ላኪን እግል ዲመ ጠፌሕ።

ሸዕር ግሉልማቲ መጽአኮ ኢልብል
ምን ሞት ኢቀጽጽ ወምን መሕበር ኢከጅል
እት ሰፈር መጽአክ እብ ዐረባት ወእገር
እት ሰክብ መጽአክ እት ትትሐ'ለም ወተሐንርር
ዶል ሸቃልክ መጽአክ እት ተሐሰብ ወትፈክር
ምስል ፈታይክ መጽአክ እት ትትሃጀክ ወትመክር
ከእሊቲ ሸዕር፡ ለይአምሩ ለአምር።

Moደ

ቅሰት ሱረት

ምን እሎም እት ሸዋሬዕ
እት ለአንጎጉ አዋልድ ለሻቅሎ
አንፋር ሐቆ እንተ አሰክ ቻይነ
ኢቲጊሰ። እግልሚ፡ በክት እሊ
እት ሱረት እንርእዩ ለህሌነ ሻብ
ኢልብጸሐከ።

እት ቻይነ፡ እት ሸዋሬዕ አዋልድ
ለሻቅሎ ወለለአትዕቦ አንፋር፡ እብ
እዩሳም እንዴ ትጸበጠው፡ እብሊ
እትለ ሱረት እንርእዩ ለህሌነ



አግቡይ አምዕል ታመት ዑቅባም
ልውዕሎ። አፍ ጅሙል ጭንጫይ
ኢለአትዩ ለትብል መሰል ትግሬ
ምን እሊታት ብህልት ቲ።